

Sle

يحس (لاعلوط

منارج والسراب

منشبورات







Author: Muhammed Al-Maghout

Title:

Al- Mada: Publishing Company

First Edition 1999

Copyright ③ al-Mada

اسم المـــؤلف: محمد الماغوط

عنوان الكتاب : خارج السرب

الناشير : المدى الطبعة الأولى : ١٩٩٩

الحقوق محفوظة

دار كا للثقافة والنشر

سورية - دمشق صندوق بريد: ۸۲۷۲ أو ۷۲٦٦

تلفون : ۲۷۷۲۹۹۹ - ۲۷۷۲۸۹۹ - فاکس : ۲۷۷۳۹۹۲

بيروت - لبنان صندوق بريد : ٣١٨١ - ١١ فاكس : ٢٦٢٥٢ - ٩٦١١

Al Mada: Publishing Company F.K.A.

Nicosia - Cyprus , P.O.Box .: 7025

Damascus - Syria , P.O.Box . : 8272 or 7366 . Tel: 2776864 . Fax: 2773992

P.O. Box: 11 - 3181, Beirut - Lebanon, Fax: 9611-426252

All rights reserved. No parts of this publication may be reproduced, stored in a retrieval system, or transmitted in any form or by any means, electronic, mechanical, photocopying, recording or otherwise, without the prior permission, in writing, of the publisher.

خارج السرب



الديكور

شباك تذاكر إلى اليمين قريب من الجمهور، في الوسط وفي عمق المسرح غرفة اجتماعات وتمارين، منفضة سجائر معدنية طويلة إلى جانب الباب، أحواض زهور، مدخل ومخرج كواليس، وماتبقى ديكور مشهد الشرفة في مسرحية روميو وجولييت المتعارف عليه، وعلى الجدران تتوزع صور كبار الممثلين والممثلات والمؤلفين المسرحيين في العالم: شكسبير، فاغنر، سارة برنار، لورنس اوليفييه، تشيخوف، بريخت، تتوسطها صورة كبيرة بإطار لفريد الأطرش وهو في ذروة صداحه ونواحه واتساع فمه.

الممثلون

المنتج	هارب من دلف السياسة إلى مزراب الفن
المخرج	مجهول الاتجاهات والمواهب
روميو	مغرور دون موهبة
جولييت	مغرورة ولكنها موهوبة ، وعندما تنفعل تتحدث أحيانا
	باللهجة المصرية
مركشيو	مبارز من أقرباء روميو
تباليت	ميارز من أقرباء حوليت

المهندس مهندس صوت وإضاءة مشاهد عجمة إنظال لأدماره القرصية و

مشاهد عجوز نظرا لأدواره القصيرة والمتباعدة مع المهندس يمكن أن يلعبا أكثر من دور في العرض ، مشاهد ، ساعي بريد ،

مهندس صوت وإضاءة

عاطف مستخدم يقوم بكل ما يتطلبه المسرح إلا الوقوف على خشبته كممثل ، وهذا حلمه الأبدي الذي يقاسي الأمرين لتحقيقه

المندوب ناطق باسم لجنة عربية رسمية وداهيتها

أبو ماهر عضو في اللجنة ومطربها

أبو نوار عضو في اللجنة

أبو بسام عضو في اللجنة

أبو قصي عضو في اللجنة

أبو مضر عضو في اللجنة

الدكتورة رئيسة اللجنة

الاستعدادات جارية على قدم وساق لافتتاح العرض الجديد لمسرح النخبة .

تفتح الستارة على ظلال قاتمة لمشهد الشرفة في مسرحية روميو وجولييت لشكسبير حيث يلتقي العاشقان خلسة في الليل ويتناجيان .

الممثل المغمور عاطف والذي يعمل مستخدما لدى الفرقة في الوقت الحاضر، يستغل خلو الخشبة للحظات ويرتجل حوارا عاطفيا من عندياته أو محفوظاته مع بطلة المسرحية التي تمثل دور جولييت حيث يتخيلها واقفة على الشرفة ممدودة الذراعين لاحتضانه، وترافق تحركاتهما على المسرح بقع ضوء حمراء أو صفراء أو خضراء حسب المشاعر التي يبوح بها كل منهما للآخر دون أن تفضح شخصية عاطف.

جولييت أيها الأمير روميو صوت أيتها الأميرة جولييت جولييت آه لا أعرف ماذا أقول الصوت لا عليك أنا أتحدث ه

لا عليك أنا أتحدث وأقول عنك وعن إمارة فيرونا والعالم

أجمع . كل ما في الكون يدور حولك ومن أجلك : الشعراء . الفرسان . الملوك ، الأباطرة ، العبيد ، حتى الشائعات والأقاويل ، وأنت ثابتة أبدا كالشمس في مكانها تضيئين العالم حتى الهوام والحشرات ، وتبقين قلبي في ظلام اللوعة وديجور الفراق ، لماذا ؟ لماذا ؟

> لا أعرف ، لا أعرف جولييت

> > جولييت

الصوت

جولييت

الصوت

جولييت

الصوت

أريد أن المسك ، أن أشم رائحة عطرك ، وشعرك وأنفاسك الصوت ووسادتك . أريد ولو خيطا من ثيابك أو خصلة من شعرك تواسيني في ليل السهاد الطويل.

وأنا أريد زرا من قميصك أو حلقة من درعك ، أو قطعة من لسانك لا أعرف من أين تأتيني بهذا الكلام الجميل

لبيك يا أميرة الأميرات لبيك

لا ، حذار ، وإلا تكومت جثة هامدة

ما العمل إذن والليل يمضى ويمضى

لا أعرف ياحبيبي لا أعرف «يختفي خيال جولييت»

أنا أعرف «مخاطبا نفسه» ، أيها الأمير روميو ، أيها الفريد في شجاعته وجماله وبهانه وهندامه ، إنها تختبر شجاعتك ووفاءك ، وكل مافيها بانتظارك

«يعود خيال جولييت إلى الظهور على الشرفة»

8

وكل مافيها بانتظارك... عيناها ، شعرها ، جيدها ، شفتاها ، ابتسامتها ، لعابها ، وقصورها وأطيانها ... أسرع أسرع قبل أن يخطفها أحد من أمام ناظريك كما تخطف البزاة حمامة وديعة

«جولييت في حالة ذعر مع موسيقى معبرة عن الموقف» أسرع على أسرع فالأعداء يحيطون بك من كل جانب ، أسرع على حصانك ، على قدميك ، ازحف على بطنك على مرفقيك ، لقد حمي وطيس الغرام ولامجال للتراجع بعد الآن . تقدم... تقدم... هجوم... اقتحام... نار

«ثم يختفي صوته وسط قعقعة السيوف وصهيل الخيول ولعلعة الرصاص والهتافات البعيدة الوهمية التي تدوي تحية وإكبارا لادائه وانتصاراته الوهمية مثل : برافو ، رائع ، أعد ماصار ، ماصار .

مع رنين الهاتف من شباك التذاكر يضاء المسرح على عاطف بثياب المستخدم وهو يحمل سطلا بيد ، ويشهر مكنسة باليد الأخرى مندفعا نحو الشرفة التي غاب عنها طيف جولييت ، ولانه مازال تحت تأثير الحلم يلتفت إلى الجمهور ويحييه بعدة انحناءات ثم يلتفت مناديا » .

جولييت ، جولييت ، وين رحت ؟ مانك سامعة التصفيق ، الناس راح تخلع المقاعد ، هيك بتحرجيني قدام الجمهور ، «يعود ويخاطبها من قرب السلم»

صحي التصفيق الي أقوى بس هادا النجاح الي والك...

«التلفون يتابع الرنين فيذهب للرد وهو مازال مأخوذا بنشوة الحلم»

ألو نعم : هون مسرح النخبة ، بدنا نقدم المسرحية الخالدة «روميو وجولييت البطل» أنا البطل ، مستحيل ماعندي وقت ، معك حق ، كنت بمصر باستوديو الأهرام ،

عم نصور فيلم ، أنا واقف فوق الأهرام وقدامي بساتين الشام ، أي أنا البطل كمان ، وبعده مباشرة مسلسل عن انهيار الشيوعية وتفكك الاتحاد السوفياتي وظهور البروسترايكا باللهجة البدوية لشركة فوكس للقرن العشرين ، وفيلم بوليسي عن حرب الخليج لنفس الشركة بس للقرن الواحد وعشرين ، وبدي اختم حياتي الفنية بفيلم سياسي كوميدي درامي راقص عن الأمة العربية مع ميادة الحناوي ، بس على شرط : أنا غنى وهى تمثل .

جولييت تروك التلفون وكلم المخرج

عاطف شوبدومني

جولييت شو بدو؟ يا قهوة يا شاي

عاطف «ينصرف إلى داخل الكواليس أو إلى غرفة الاجتماعات

جولييت وعدد من الممثلين يتوزعون على خشبة المسرح ويتحركون ذهابا وإيابا وهم يراجعون أدوارهم فرادى ، وينطقون

بعض الجمل بصوت مرتفع »

ماركشيو أيتها البرودة الدنيئة ، والطاعة الخسيسة ليس لك إلا طعنة في الصميم

تيباليت يالك من طفل غر

روميو أعد سيفك إلى غمده يا مركشيو

جولييت لقد فقدت الرحمة حتى في طيات الغيوم

مركشيو «ملوحا بسيفه» هذه هي القيثارة التي سترقص على أنغامها

تيباليت أنت متواطئ ... أنت متواطئ

جولييت لقد اقترب النهار ، وددت لو نكون خارجا ، ولكن دون أن

نبعد أكثر من عصفور	
أريد أن أكون عصفورك	روميو
أوه روميو	جولييت
أواه جولييت	روميو
لا شيء يا زعيم الهررة ومالك عرشها ، لا أريد سوى روحا	مر کشیو
واحدة من أرواحك السبعة	
تبا لرأسك المائل كرأس كل إيطالي لا يهتم إلا بالقتال	تيباليت
والشجار	
«باكية» تدفق أيها الدمع الهتون ، تدفق ، تدفق	جولييت
خليلك شوي لافتتاح الليلة	مر کشیو
عندي دموع بتكفي لفيلم هندي	جولييت
«يشهر سيفه» إذن فأنا أتحداك أيتها النجوم	روميو
وانت على مهلك شوي	مركشيو
وانا عندي غضب وانفعالات مابعرف وين بدي روح فيها	روميو
« في هذه اللحظة يمر المخرج مقطبا شاردا »	
الغضب الساطع آت	مر کشیو
رجاء بلا حكي بالسياسة	المنتج
« وينصرف في حال سبيله »	
اجتماع أنسة جولييت	المخرج
نعم أستاذ	جولييت
بلغي الجميع اجتماع بعد عشر دقانق	المخرج
موسع ولاً مصغر	جولييت
أنا قلت اجتماع وبس	المخرج

« ويختفي بين الكواليس »

عملنا اجتماعات بهالمسرحية أكثر ماعملنا بروفات تيباليت

وأحيانا بالاجتماعات منعمل بروفات ، وبالبروفات منعمل مر کشیو

اجتماعات ، ليش ماحدا بيعرف

لحتى ماحدا يكشف سر المهنة روميو

أنا عمري ما تعاملت مع مخرج باطني متلو تيباليت

اعذروه يا جماعة ، هادا العمل مهم ، وبدو مخرج جدي ، جولييت

لانو فيه ممثلين ما بينعطو وجه

«غامزا من قناة روميو » ولا بينعطو أدوار عاطف

عاطف شى ما بيعنيك ما تتدخل فيه ، خليك بشغلك وبس مركشيو جولييت

لا تزودوها عليه ياجماعة... لاتنسوا انو ابن مسرح كمان...

بدك تحطينا بمستواه

كل واحد يشوف شغلو ، وتركونا منو ومن غيرو جولست

> هلا حضرتك صرت مساعدة مخرج مر کشیو

لا مساعدة ولا شي ، بس لازم نتعاون مع بعضنا ، مو أحسن جولييت ما يجيب مساعدة تعطلو أكثر ما تساعدو

> دعو لربكن تنجح المسرحية تيباليت

روميو

وليش حتى ما تنجح ؟ أحسن ممثلين ، وأحسن ديكور ، جولييت وأحسن موسيقي ، وأرقى مشاهدين ، ومسرحية خالدة ،

ومخرج جوائز

«المخرج يسير منفردا عن الجميع ساهما شاردا ويسجل ملاحظات على دفتر صغير»

والله يا عمى إذا مخرج جوائز ما عاد في حكي... بدنا عاطف

نشحد

جولييت فال الله ولافالك

تيباليت خليك بشغلك

جولييت لا تردو عليه ، النجاح حاطو بجيبو

مركشيو واضح

جولييت وبتعرفو بشو عم يفكر هلا

روميو بالمسرحية

جولييت أبدا ، عم يفكر بالمسرحيات الجديدة يللي بدنا نقدمها

بعدها

روميو يا ريت نقدم هملت

مركشيو لا بستان الكرز

تيباليت أو تاجر البندقية

جولييت بدكن رأيي عرس الدم أحلى مسرحية بهالوقت

المنتج لا لا أرجوكم لا دم ولا قتل ولا بنادق ، بعدو عن السياسة

قد ما فيكن أضمن

مركشيو خلونا ببستان الكرز

تيباليت أو بيت الدمية

مركشيو بستان الكرز

تيباليت لأ، بيت الدمية

جولييت ليش عم تتخانقو ، لنخلص عرض هالمسرحية وعليكم خير ،

بيجوز تقعد سنة ، سنتين ع لمسرح ، وندور فيها العالم

كلو

«الممثلون يصفقون ويهللون ابتهاجا »

روميو	وخود بكرة على ضب شناتي
مر کشیو	وتأشيرات خروج وتأشيرات دخول
تيباليت	وتجديد جوازات
روميو	وتبديل طيارات
مركشيو	وتغيير طقس من بلد لبلد
المنتج	كل هالامور حطوها وراء ضهركن ، ماتحملو هم بنوب ، اذا
	نجحت المسرحية مثل ماعم تقولو ، ودارت العالم ،
	وحصدت جوائز عربية وعالمية ، صحي راح نحصد جوائز
	كتيرة
جولييت	ولو؟ شو بتريد ناخد معنا منجل لحتى تصدق
المنتج	بهالحالة بدي اقلب المسرح فوقاني تحتاني
مر کشیو	لازم نغير الستارة ونوسع المسرح
تيباليت	ونوسع الصالة ونجيب مقاعد اضافية
روم يو	والمقاعد القديمة قماشها بدو تغيير وتنجيد من جديد
المنتج	ولك شو توسيع وتنجيد ، براسي مشروع أكبر من هيك
	بكتير بدي أعمل من هالمسرح قبلة الفن والفنانين بالوطن
	العربي كلو ، لانو راح يكون نواة لمشروع حضاري ما الو
	مثيل ، مركز دراما ، مسرح تجريبي ، قاعة مناقشات ،
	شقق سكنية للممثلين . ودار توليد لنسوان الممثلين ودار
	حضانة لاطفال الممثلين
جولييت	وياريت بهالمناسبة مأوي عجزة للفنانين الملتزمين ، لانو
	ماحدا بيعرف شو رح تكون نهايتهن
المنتج	طبعاً ، طبعاً ، مشروع متكامل مع حدائق تتناثر في

جنيناتها تماثيل لمشاهير الفنانين العرب والاجانب

جولييت وتمثالي أنا وين بدكن تحطوه ؟

روميو بمشروع دمر

جولييت تضرب انت وهالقهوة ، من وين عم تشتريها

عاطف من السوق ليش

جولييت لا حلوة ولا مرة ، كانها مخلوطة تبن تراب ماحدا بيعرف

روميو والشاي نفس الشي

المخرج اجتماع ، اجتماع نسيتو ولا لازم ذكركن كل دقيقة

جولييت كنا بدنيا تانية يا أستاذ

المخرج وين يعنى

جولییت ببرج ایفل

المخرج يالله بسرعة ماعاد فيه وقت

«يدخل الممثلون الى غرفة الاجتماع تحت رقابة المخرج وعندما يهم هذا بإغلاق الباب يأتي عاطف مسرعا وهو يطالع نصا

مسرحيا ويريد اللحاق بالممثلين»

المخرج لوين

عاطف ع لاجتماع

المخرج بس هادا اجتماع ممثلين مو اجتماع مستخدمين

عاطف أرجوك استاذ خليني احضر اجتماع واحد بهالعمر ، بوعدك

لا بحكي ولا بسمع ولا بعلق

المخرج لكن ليش بدك تحضر كمالة عدد

عاطف أرجوك أستاذ أرجوك

المخرج لتصير ممثل ، موبتحضر الاجتماعات وبس ، وبتترأس

الجلسة كمان لانك أكبر الاعضاء سنا لكن هلا أنا شو؟ عاطف ممثل احتياط ، احتياط ، كام مرة بدي اشرحلك ياها المخرج شو يعنى احتياط ، إذا بتريد عاطف يعنى إذا مرض ممثل سافر ، دعستو سيارة اعتذر ، وهادا المخرج مو وارد بتاتا لانو مو ممكن يعتذر حدا عن مسرحية أنا مخرجها ، أو إذا حدث طارئ مفاجئ لأي واحد من الفرقة بتاخد دورو ، كل شي محتمل احتياط بالتمثيل ، احتياط بالجيش ، احتياط بالرياضة ، عاطف احتياط بالسفر أي هي موعيشة والله هادا الموجود «ويغلق الباب في وجهه بعنف» المخرج ممثل احتياط ، يعني متل حكومة ظل ، حكومة بالمنفى ، عاطف أكل هوا ، يعني ما بمثل دور إلا إذا تأخر ممثل أو مات ، ومابفوت على ملعب إلا إذا انطرد لاعب ، ولابسافر إلا إذا سكر راكب ومافاق على الموعد ، ولا بتجوز إلا إذا واحد طلق ، ولا بحارب إلا إذا صار اجتياح . «ثم يستغل ظهور مهندس الصوت والاضاءة فيقترب منه ويبثه راح يجننوني بقصة هالاحتياط يا استاذ عاطف

انت ابدى منها ؟ يعني لتلعب الأمة العربية دورها ع لمسرح

بدك تطول بالك ، الأمة العربية كلها صارت احتياط ، شو

«يأخذه على قد عقله»

المهندس

عاطف

الدولي بعد عمر طويل حتى العب دوري أناع لمسرح العربي الهفتان

المهندس هيك شي

عاطف إذن عمرها ماراح تلعبو ، حظى وبعرفو

المهندس لأبدها تلعبو

عاطف لأماراح تلعبو

المهندس ما فيها شي ، منسأل الاتحاد الرياضي

عاطف وبهالوقت الضايع شو بدي أعمل أنا

المهندس بتكنس بتجلي ، بتنضف الصالة ، بتقطع تذاكر ، بتقدم

طلبات للممثلين ، خيارات كتيرة قدامك

عاطف «يقوم بكنس المسرح ويغني بصوت خافت » : أنا عندي حنين مابعرف لمين

المهندس عمرك ما تيأس من شي ياعاطف ما بتعرف كيف الظروف والأحداث بتتغير وخاصة ببلادنا

المنتج رجاء بلاحكي بالسياسة

« ثم يختفي كما ظهر »

المهندس أمرك أستاذ ، ولذلك أنا برأيي بهالوقت المستقطع تحفظ

كل الأدوار يللي بالمسرحية حتى النسائية منها ما بتعرف

عاطف حافظها كلها وحافظ مسرحيات طرطوف والام الشجاعة ،

والجرة وكل مسرحيات بريخت وتشيخوف وموليير ، وحافظ كمان كل أغاني عبد الحليم وفريد الأطرش بس مركز على فريد أكثر شي بهالظروف ، مو كمطرب ،

كمفكر

وليش فريد بالسلامة المهندس بكرة بتعرف والتاريخ بيعرف ، وبعدين حافظ أوبرا عايدة عاطف واوبرا كارمن ، بسمعك مقطع من أوبرا عايدة لا أرجوك المهندس «يشرع في غناء أوبرالي مجلجل ، يخرج على إثره المخرج عاطف ساخطا مزمجرا فيتوقف عاطف عن الغناء مرتبكا فزعا » شو قصتك انت؟ آ ، ما خليتنا نفهم كلمة ، أو نظبط المخرج مشهد ، او نوجه نصيحة ، شو بدك فهمني أرجوك أستاذ جربني بمشهد صغير ولو عشر دقائق عاطف وشو الدور يللي بتحب تلعبو ، احكي بسرعة المخرج عاطف دور روميو قدام جولييت ؟ لا متواضع كتير المخرج بروفة صغيرة خمس دقايق وإذا ما مشي حالي بضب عاطف غراضي وبمشي وأي مشهد بتحب تقدم المخرج مشهد الشرفة بالليل أو مشهد الانتحار عاطف وليش ما بتنتحر وبتخلصنا بدون تمثيل المخرج أنا ما عم امزح أستاذ عاطف وأنا ما عم امزح ، وما عندي وقت للمزح ، تعو يا جماعة المخرج سمعو هالسمعة «يخرج الممثلون مستفسرين» خبر أستاذ الممثلون شو فيه لبش معصب أستاذ

المخرج ليش معصب

«وهو يشعل لفافته بأصابع مرتجفة»

مشهد الشرفة ، مشهد الانتحار ، وأجمل مشاهد الحب والشوق والحنين ، والعناق والتنهدات وتلاحق الأنفاس بدو يمثلو السيد عاطف

جولييت ياخرابي

المخرج وكل ريحة تمو بصل وتوم

«الممثلون يضحكون »

عاطف شو بعملكن هي منتجات بلادنا «وينسحب مهانا وسط ضحكات الممثلين»

جولييت الولد أكيد تجنن

روميو الله يعينو على عقلاتو

مركشيو وعلى احلامو

تيباليت بيقولو مثقف كتير

مركشيو لا مثقف ولا شي ، وصل للجامعة ودرس بكل كلية شهر وبعدين طردوه

جولييت يعنى ثقافتو متل سطل الشحادين

المخرج كيف اجاع لمسرح ما بعرف

مركشيو اجا مع الديكور

روميو وبدو يروح مع الديكور

المخرج يالله بسرعة انت وياه ، الساعة عشرة بدنا نكون جاهزين

وإلا بعملكن اجتماع ثاني

الجميع لا دخيلك

«ينصرف الممثلون ويبقى عاطف وحيدا على المسرح ويستأنف الكنس » بتعرف ليش المخرجين والمنتجين عم يتجاهلوك يا عاطف المهندس لىش ؟ عاطف أناقتك الفظيعة . شو هالثياب والالوان الضايجة هي ؟ المهندس شبها ؟ عاطف أصفر على أحمر على بني على أسود . مانك شايف حالك ؟ المهندس يا استاذ المشكلة ، أنا ما بعرف عبر عن مشاعري عاطف بالحكي . بعبر عنها بالثياب بالالوان ، مثلا : هادا الاحمر لاني عاشق ، والاصفر لاني وحيد ، والاخضر لاني متفائل والاسود لاني متشائم ، والرمادي لاني ضايع . ضايع وراح تضيعنا معك . المهندس المهم : أنا عندي حنين ما بعرف لمين يمكن للاستعمار . عاطف «يرن الهاتف» رد ع لتلفون يا عاطف وين شارد «ويتابع مراجعة أوراق بيده المخرج

المخرج ردع لتلفون يا عاطف وين شارد «ويتابع مراجعة أوراق بيده وهو يقيس المسرح طولا وعرضا ، ثم ينظر إلى ساعته والى الصالة بقلق»

عاطف ألو نعم... آسف ماني فاضي لأي دور ، مشغول يا أخي مشغول ، وما بوقع أي عقد أو أي اتفاق مهما كان آسف هلأ ماعم وقع غير ع اوتوغرافات

المخرج مين ع لتلفون ؟ إلي ؟ عاطف لأ إلي أنا المخرج الك ؟ مين ؟

معجبين ومخرجين وشركات انتاج عم يلاحقونيي ليل ونهار عاطف لاطلع بأي مسرحية أو فيلم ولو ضيف شرف عجيب وليش ؟ المخرج قال لانو وجهى خير على كل عمل بشارك فيه أو بحط ايدي عاطف وجهك خير ، ولهلا ماحدا شرف ع لصالة غير ثلاثة واحد المخرج أعور ، وواحد أطرش ، وواحد أقرع أي مافيها شي الأعور شايف كتير بزمانو وجايي يسمع ، عاطف والأطرش سمعان كتير . وجاي يشوف ، والاقرع هر شعرو من كتر ماشاف وسمع بزمانو... وجايي يروح عن نفسو طيب كيف اجو مين دعاهم المخرج بيكونوا قرايبين حدا من الممثلين عاطف صارت الساعية تسبعية ونص ولسبه ميا شيرف حيدا من المخرج المدعوين المعتبرين طول بالك أستاذ دائما بحفلات الافتتاح بيصير تأخير عاطف لتكون ما وصلتهن بطاقات الدعوة المخرج أعوذ بالله وزعتها بايدي شخصياع لجميع ، بعدين طمن عاطف بالك أستاذ مافي عربي بيرفض دعوة ببلاش ولو كانت ع لمخفر وفيها فلقة . بعدين لا تنسى انو المسرح بعيد وبره البلد ، ليش اخدتو المسرح بره البلد وبعيد عن الناس والمواصلات مابعرف. لاني بدي المشاهد يجي ع لمسترح مثل مالمتريض بيجي المخرج لعند الطبيب ، والطالب ع لمدرسة ، والجندي ع لحرب .

عاطف بنص البلد ، والمسرح رمز التقدم والحضارة يكون برد البلد ينص البلد ، والمسرح رمز التقدم والحضارة يكون برد البلد ، تروك المخرج يا عاطف يا أبني ، لما المسرح بيكون بنص البلد ، تروك الضجة وزمامير السيارات مين بيكون زباينو ؟ ينني مالاتى محل بالسينما أو كرسي فاضية بخمارة أو لعبة ورق بقهوة أو خناقة بشارع ، أو العسكري المتخلف و الهربان من الدورية

عاطف معك حق وخود على فصفصة بزر وطقطقة بوشار ، وبارد ياعطشان ، وهوي ، ولحق محلات

المشاهد العجوز السلام عليكم

عاطف نعم

عاطف

المشاهد العجوز المسرحية فيها تزليط؟

عاطف المشي من هون ما بتستحي على شيبتك؟

المخرج سمعت بادنك

«يرن الهاتف ، ويخرج الزبون »

عاطف أنو ، نعم مسرح التخبة... «للمخرج» عم يسألو عن عنوان المسرح ، كرت المسبحة

المخرج التبهاي ع لنوعية أهم شي «يذهب»

تكرم أستاذ ، الو نعم المسرح معك ، بدك العنوان بالتفصيل ، عنى عيني ، بتاخد باص الشرق للنقل والتسويق المسرحي ، بيوصلك نضواحي البلد ، بتنزل وبتاخد اي ميكرو باتجاه الطريق الزراعي ، ع لطريق فيه مزارع ليمون وتفاح ومد جن وبعدين فيه أحر ش وغابات ، طبعا طبعا

مناظر بتجنن ، بعدين بتوصل لاول جسر بتلاقي دورية مسرور ، بعدين دورية شرطة ، بعدين دورية تصوين ، بتمشي شوي فيه جسر ثاني ، بتلاقي حاجز مكافحة ، بعدين حاجز عسكري ، بعدين حاجز أمنى ، بعدين حاجز نفسي ، أي حاجز نفسي بدك تخترقو مثل السادات ، أي السادات السادات ماغيرو ، وبعدين بوجهك بتلاقي أنوار المسرح عم تتلألا في ظلمات الجهل والفقر والتخلف .

« يغلق السماعة

أصوات سيارات تقترب ثم وقوفها وفتح واغلاق أبواب على ابواب المسرح . يظهر المنتج يفرك يديه فرحا »

بلشو يجو المدعوين

المنتج

عاطف

المنتج

عاطف

المنتج

عاطف

والزباين عم يحجزو بالتلفون

«يخرج من كوة التذاكر »

طبعا مسرح النخبة وين بدهن يروحو ، معك سيجارة

تفضل ... وأكاليل الورد عبت المسرح والممرات

الاكاليل للموتي مو للأفراح والمناسبات . فال الله ولافالك

ليش متوتر أستاذ ، مافي داعي للتوتر أبدا لحد هلا كل شي . تمام

المنتج دانما لينة الافتتاح بيتوتر الانسان مثل لينة الدخلة ، الله يطعمك ياها

عاطف ما في مشكنة إلا الطقس ، سمعت النشرة الجوية المنتج لشو النشرة الجوية ، الطقس قدامنا

«يتجهان الى خلفية انمسرح المطنة على المناظر الطبيعية » يا سلام ما أحلى هالليل ، ما أحلى هالنجوم ما أروع هانهدو،

عاطف والله بلادنا جنة

المنتج هدو، خرج الشعر ، عرفت هلا ليش أخدنا المسرح بعيد

عن المدينة وعن كل شي

عاطف أي والله فهمت

«صوت انفجار بعيد »

المنتج سمعت شي

عاطف يمكن اسطوانة غاز

«انفجار ثان أقوى»

المنتج لأهي مو اسطوانة غازهي قنبلة مدفع

عاطف يمكن قنبلة هاون أو مدفع من سراييفو

المنتج وينك ووين سراييفو

عاطف سيدي الصوت بالليل بيودي

«انفجار ثالث »

المنتج وهادا من وين

عاطف يمكن من أفغانستان

« عدة انفجارات متتالية وقريبة جدا »

المنتج «مذعورا» يا ساتر ، صار الضرب هون ، ومو مدفع واحد عاطف لا تخاف سيدي لاتخاف ، يمكن عم يستقبلو حدا ، أو عم يودعو حدا بالمطار وهي ٢١ طلقة تحية الو... بيظهر شخصية

مهمه

«صوت سيارات إسعاف» بس سامع صوت سيارات أسعاف	المنتج
يمكن صابوه	عاطف
لروح شوف شو القصة وطمن الجمهور «يذهب»	المنتج
«يخرج المخرج من غرفة الاجتماعات يتبعه الممثلون وهو	
غاضب كعادته »	
كلمة أخيرة قبل العرض ، كل شي اتفقنا عليه بالاجتماع ،	المخرج
بدو يتنفذ بحذافيرو ومتل ما قلنا المسرح ثقافة ، و الممثل	
قبل مايطلع ع لمسرح بدو يكون يعرف حركة التاريخ	
بالعالم كلو مفهوم	
مفهوم بس كيف بدك من الممثل أو غير الممثل يعرف	جولييت
حركة التاريخ بالعالم ، وهوي ما بيعرف حركة المرور ببلدو	
كيف عم تمشي	
شو هادا أنسة جولييت من كون بالتاريخ منصفي بالمرور	المخرج
بسرعة شباب «ينصرف الممثلون »	
طول بالك أستاذ مافي داعي لتعصب ، منشان صحتك . أنا	عاطف
شايف كل اجتماع وكل محاضرة عم ينقص وزنك شوي	
« وهو يرفع بنطلونه »	المخرج
مشكلتي ما بقدر ساير حدا أو راعي حدا على حساب العمل	
هادا معروف عنك سيدي . ليش بيسموك مخرج الجوانز	عاطف
«مهندس الصوت والإضاءة يقوم بعمله »	
كيف الشغن يا ابني	المخرج
كلو تمام	المهندس
الإضاءة	المخرج

عاطف أن شايفها ضعيفة شوي

المهندس نورك بيكفى

المخرج والصوت عم يطلع وينزل ليش

المهندس حسب بعد الممثل أو قربو من الجمهور

عاطف «يجرب الصوت بواسطة ميكرفون متنقل»

الو... الو... أيها الجمهور الكريم... الولو... أيتها الجموع الحاشدة... أيتها الجماهير الحاقدة . أنا شايف الصوت مو

المهندس لأظابط وما فيه شي ، هات من أيدك

عاطف الو ... الو

المهندس خلصنا عاطف

المخرج بس انت وياه

« للمهندس »

سمعنى المقدمة الموسيقية لشوف كيف صارت

المهندس أمرك أستاذ

المخرج «لعاطف»

وانت روح لمحلك وما تتحرك منو

عاطف أمرك

«يذهب الى شباك التذاكر ويغلقه على نفسه كالقفص»

المهندس في عنا موسيقى تشايكوفسكي وموسيقى بروكييف لنفس المهندس المسرحية

« يضع شريطا في المسجلة ، تنساب الموسيقى ، ويسلطن عليها المخرج والمهند س »

المخرج الموسيقى بحر شو بدك تغرف لتغرف منو أه يا بروكييف معلم... معلم يا عمي معلم «بعد فترة من الاصغاء يبدل المهندس الشريط بآخر» المهندس ليش تشايكوفسكي من شو بيشكي المخرج إذا بروكييف معلم ، هادا عملاق... يا أخي عملاق . يا سلام... يا سلام ياريت تعملي مزج بين التنين ، لانو هي

حلوة وهي حلوة ... والتنين نازلين بمحلهن ومين قلك ماعملت المزج وخلصت ، لاني بعرف زوقك ، عاطف

عاطف «يأتي عاطف مسرعا » نعم أستاذ

المهندس ناولني الشريط رقم ١١ عاطف وينو

المهندس ع لمسجلة الثانية يللي بتضل تلعب فيها

عاطف حاضر

«الموسيقي مستمرة»

المخرج يا سلام ، لو شكسبير بدو يألف موسيقى هالمسرحية ما بيألف أحلى وأروع من هيك

عاطف تفضل أستاذ

المهندس شكرا «يضع الشريط المطلوب في مسجلة العرض» وهلا سمعلي هالمزج - شو متقن ، كأنو قطعة واحدة ، ومؤلف واحد

« تنطلق الموسيقي جميلة ساحرة معبرة »

المخوج يسلمو هالايدين كلك زوق

المهندس ومع الحركة التانية بيانو لشوبان ، ولانو شوبان متل ما بتعرف

المخرج أنا يللي بعرف ، اله الرقة والحنان والشاعرية ،

«تنساب ضربات البيانو المتتالية نشويان ، والكل يهز رأسه ويتنهد »

المهندس وهلاً بين الحركة الثانية والثالثة من المزج سماع أستاذ بس سماع

المخرج ما حدا يحكى معى خلوني محلق

« ومن قلب ضربات البيانو الشاعرية الحالمة ينطلق صوت شادي جميل كالزلزال وهو يغنى : يا حبيّب ميل وميل »

المخرج شو هادا ؟

المنتج شوصار؟

الممثلون «من الكواليس»

شو فيه

عاطف ما في شي ، ما في شي شادي جميل عم يغني

المخرج وقفو، وقفو

المهندس لحظة سيدي لحظة فيه غلط

« الفناء مستمر »

المخرج كر الشريط شوي

المهندس عم كرّو

« الغناء مستمر »

المخرج غيرو...

المهندس في غلط بالاشرطة ، في حدا لعبان بالاشرطة ، عطيني الشريط رقم ١٢

عاطف تفضل أستاذ

«المهندس يشغل الشريط تنطلق اغنية

روق علي شوي لكلودا شمالي

وفي محاولته المستميتة لايجاد المقدمة الموسيقية للمسرحية . يفاجأ هو والمخرج تباعا بواحدة من تلك الاغاني الدارجة والتي تملأ سمع المواطن ليل نهار مثل :

مرتى حلوة ما بطلقها

على مهلك ع لدقة ونص بيغتبر قلشينك

رمان النحب معبا العب

جمالك يا سكر دايب

خلقك الله وكسر القالب»

جولييت ايه الزيطة دي

كبرت يا بيي صارت صبية

یا بتخطبلی یاها

يا بتاخدني ع لعصفورية

المهندس «يوقف المسجلة»

المخرج والله انا يللي بدو يروح ع لعصفورية

«مشيرا الى عاطف» ماحدا مخربط الاشرطة غيرو ، لانو ما

أخد دور روميو

عاطف أنا؟

المهندس

المخرج بس انت وياه ، معقولة غيب كام سنة عن البلد ، ارجع لاقى

مليون مطرب ومطربة ، الله يعينكم كيف متحملين هالحالة الله بيبلي وبيعين عاطف كل حارة مطربة ، كل موقف باص مطرب المخرج استاذ مفكر هالزحمة والطوابير قدام ادارة الهجرة والجوازات عاطف والسفارات لاسباب اقتصادية أو سياسية أبدا شو عم يصير بحالة المرضى بالمستشفيات ، والطلاب وقت المخرج الامتحانات قعود وروق شوي استاذ لسمعك هالشريط وبتدعيلي عاطف «يضع شريطا فينطلق صوت فريد الاطرش بنادي عليك» سماع استاذ سماع تضرب انت وياه انا رايح اتسطح ، انقبر ، نام المخرج عاطف والعرض استاذ هادا شعب بدو روميو وجولييت ، خليه يسمع ويشوف المخرج مدرسة المشاغبين والعيال كبرت لحتى يورق الصوان «يخرج» « تنزل مسرعة وغاضبة » جولييت كيف بدي جهز حالي «للمنتج» تفضل هالعطر يللي جايبلي ياه «يأخذ الزجاجة ويشمها » عاطف اللهم صلى على النبي انشالله بصلى عليك بالقرافة ، ولك مسرحية بتدور أحداثها جولييت بالقرن الخامس عشر وكلها أمراء وأميرات وملوك وفرسان

وبلاط وقصور ووصيفات وحفلات جايبلي قنينة ريحة تعباية

له مختومة	عاطف وال
رك يللي بدك ياه بيحضر بس أنت أمري	المنتج أمر
ي عطر فيه ريحة القرن السابع عشر أو الثامن عشر على	جولییت بد
· ·	121
أنا ما تحممت من القرن التاسع عشر	عاطف أي
ا مو شغلي ، شم حضرة المنتج شم	جولييت هاد
نزل مسترعا وأكثر غيظا وبيده قميص»	روميو «ي
ا شو هالقميص يللي جايبلي ياه ؟ من البالة ؟ من سوق	وأذ
معة . شوف حضرة المنتج ، خيش كتان نايلون ماحد	الج
رف	بيع
ن وين عم تروح هائمصاري	المنتج نك
الالوان والتفصيلة ماعليهن حكي	عاطف بسر
بتهمني النوعية يا بني أدم والماركة أهم شي	روميو ك
المنتج وهي المخرج احكو معهن	عاطف هي
ي شو بتريد	المنتج قلل
ي قميص حرير طبيعي طبيعي بتعرف شو يعني طبيعي ؟	
ي دود القزَ عم يطلع من قبتو وكمامو ، بدي كل شي	
بعي لحتى مثَلُ طبيعي	
ن هي حلق وأساور ، والله القرباط ما بيلبسوها	
ن هادا بنطنون أمير ؟ والله بنطنون عاطف أحسن منو	
ي بدكن ياه بيصير وبيحضر ، بس مرقولي حفلة الافتتاح	
ِ الْأَفْتَتَاحِ مَهُمٍ لَهِيكُ طَالِعِ خَلْقِي	
بيلتقي عطور باريسية وألبسة أجنبية راقية	المنتج ويو

عاطف بالمحلات هون ما في ، نكتها نكت

جولييت بظن ما في غير بالمنطقة الحرة

المخرج ليش في عنا منطقة حرة

جولييت طبعا بالمرفأ فيه منطقة حرة ، وع لحدود في منطقة حرة

روميو وبالجمارك وبالمطار

عاطف فظاعة عنا كل هالمناطق الحرة ، وبيقولو ماعنا حرية

جولييت ليك نحنا وين وحضرتو وين

المنتج رجاء بلا حكي بالسياسة ، مشو العرض الليلة كيف ماكان وبكرة بنفسى بنزل بشتريلكن يللي بدكن ياه

المخرج طيب ماشي الحال

جولييت وشو بدهن يقولو عنا المدعوين

المخرج ما راح يقولو شي . كلهن صحابنا ومن أهل البيت وبيعرفو انو عرض تجريبي مو أكثر

المنتج أنا ممنونك

المخرج

انتباه للجميع ، مابدي أي مفاجآت ضوئية أو صوتية أو درامية وخاصة اللغة ، النص ، ممنوع الخروج عن النص ، بدي الحوار متل ما هوي مكتوب تماما ، المشاهد لازم يحس بالنقطة ، بالفاصلة ، بالهمزة حتى بإشارات التعجب والاستفهام ، كلها بدها تكون واضحة ومسموعة من هون لآخر الصالة

عاطف أنا برأيي مافي داعي نكل هانتزمت بهالقضية بالذات ، لانو ما في ببلادنا والحمدلله أي شي حولو إشارة تعجب أو إشارة استفهام

المخرج أولا انت بره الموضوع ، ثانيا يللي قلتو بدو يتنفسذ بحذ افيرو

عاطف متل ما بترید ، مخرج جوائز مین بیقدر یحکی

المخرج كيف الحضور

المنتج كلو تمام

جولييت حاجة تجنن ياكده يا بلاش

المخرج عاطف راقب الصالة ، شوف مين من المدعوين اجا ومين ما الحا

عاطف حاضر سيدى

المنتج عم يوصلو ورا بعضهن

المخرج ولا تنسى تحجز كام كرسي لوقت الحشرة ، ما منعرف مين

بيفاجئناع غفلة

عاطف ما يبقوتني شي طمن بالك

المخرج طبعا ابن مسرح

«للمسمثلين» يالله خلولي المسسرح بدنا نبدأ : الاضاءة تمام ، الصوت تمام ، الديكور تمام ، الجهوزية تمام ، اد منك ياعاطف ، وين زهور الاضاليا والبنفسج على شرفة جولييت ؟ كتبتلك ياهن على ورقة وشجرة الليلك تحت الشرفة ، محل ما بدو يوقف روميو ويناجي جولييت ، لازم عبير الليلك والبنفسج يوصل لآخر الصالة ، ماحدا بعت ورد من المدعوين

عاطف مبنى ، بس ، ما فينا نتصرف فيهن

المخرج ليش؟

عاطف لانو عم ياخدوهن بعد العرض

المخرج لكن ليش جابوهن

عاطف صايرة موضة ، مو بس الزهر عم يرجعوه ، حتى الأكل بالمطاعم ، يبلي عم يزيد على الطاولة عم يلفوه صحابو وياخدوه على بيوتهن

المخرج هادا تطور جديد

عاطف بالكاد دبرت كام اكليل للمسؤولين

المخرج ولك الاكاليل للموتي ، بيقولو بوكيت ورد ، وبعدين ليش الورد للمسؤولين بالذات

عاطف لانهم يا حرام طول الليل والنهار ما بيسموا الا رائحة المؤامرات

جولييت وعلى شو خزيت العين

المخرج بس يا أنسة ، وشو الورد يللي حطيتو قدامهن ، انشالله بيبيض الوجه

عاطف من هالموجود بالسوق ، زنبق ياسمين ، تم السمكة ،... وتم الحوت

المنتج رجاء خلونا بالمسرحية وبلاحكي بالسياسة

عاطف وليش خايف أستاذ نص الدولة عندك

المنتج هادا يللي مخوفني

جولييت كلنا بدنا نضل خايفين حتى يبدا العرض

المخرج بتخافو وأنا موجود ، يالله كل واحد لمحلو ، أنسة جولييت لفوق ، أستاذ روميو لتحت ، أستاذ عاطف لمساتك الأخيرة ، الأرضية ، الديكور

	«يلمس بإصبعه» شو هادا ؟ دهان هون وبقعة زيت هون
عاطف	يا سيدي مسحت المسرح وشطفت الصالة ونضفت الديكور
	شي عشرين مرة اليوم
المخرج	بدي كل شي يلمع مثل المراية ويضوي متل قاعات
	فرساي . وقصور فيرونا يللي بتدور فيها أحداث المسرحية ،
	جاهزين
الجميع	جاهزين
عاطف	شو جاهزين ؟ وكلمة الافتتاح
المخرج	افتتاح شو ؟
عاطف	افتتاح المسرحية ، وتحية المسؤولين والجمهور
المخرج	هي شغلة المنتج أنا ما بحب الحكي
المنتج	ليش ها للبكة
عاطف	انت بتحب الاصول. وهيك الأصول
المنتج	طيب شو بدي قول ؟
عاطف	« يقدم له المكرفون »
	بتحيي المسؤولين والجمهور ، وبتقدم لمحة عن المسرحية
	ودور المسسرح في رقي الشعوب ، ودور الشعوب عموما
	والفن خاصة في تحقيق الحرية والعدالة وتحرير فلسطين
المنتج	يا أخي شو دخلني أنا بتحرير فلسطين
عاطف	هلاً انت راح تحررها ؟ بس هيك التقاليد ، والمسؤولين
	بيحبو يسمعو كلمة تحرير فلسطين بأي مناسبة
المنتج	أخي ما بدي قولها
عاطف	طيب مثل ما بدك بلاها ، بيجوز المسؤولية نفسهم ما عاد

يحبو يسمعوها تفضل أستاذ

المنتج (متمتما متلعثما »

أيها الجمهور الكريم ، أيها المدعوون الأكارم ، مساء الخير ، سنقدم لكم بعد قليل مسرحية روميو وجولييت لشكسبير ، نرجو أن تنال إعجابكم ، والسلام عليكم

«مستنكرا» شو والسلام عليكم؟ شو هادا أستاذ؟

المنتج عجيب ما حدا صفق

عاطف

عاطف

عاطف

عاطف

على شو بدهن يصفقو ؟ على هالقصيدة العصماء

المنتج أخطأت بشي قللت أدب شي

عاطف قللت حكي يا أستاذ ، بافتتاح فرن ، شارع طولو مترين بينحكي أكتر من هيك ، وين عايش انت

المنتج باوروبا

هادا احتقار الهن واستخفاف بمشاعرهن فيه ناس كانو بالتواليت ما حلهن يوصلو لمحلاتهن ، ناس عم يحكو مع بعضهن مالحقو يقطعو الحديث ، فيه ناس لسه ما قالو سمع شباب ، حتى حضرتك خلصت كلمتك ودرت ضهرك ، لا كلمة ، لا اشارة عن فلسطين ، عن نضال شعبنا ، عن النهضة الزراعية او الصناعية ببلادنا ، رأسا خبط لزق السلام عليكم

المنتج يعنى فيها مسؤولية

فيها خراب بيوت ، مانك شايف الجمهور كيف فاتح تمو وعم يطلعو ببعضهن ، والمسؤولين عابسين ووجوهن ما بتنفسر ، وبعضهم بش يضع شايف

المنتج لها لدرجة بتحبو الحكي

موقصة منحب الحكي او ما منحبو ، القصة قصة تقاليد عاطف واعراف متربايين عليها فعلا الجمهور مستغرب والمسؤولين وجوههم متل السم. المنتج قولك بيطلع منها شي ما بتعرف بيجوز يسحبو جواز سفرك أو يوضعوك تحت عاطف الاقامة الجبرية « صارحًا بيأس » المنتج قلتلكم من الأول مابحب السياسة بعدو عن السياسة خلصنا بیکفی ، ما بیصیر شی وأنا موجود المخرج قولك بتمرق المنتج ليش حتى ما تمرق ، شو عملت المخرج ولا يهمك كل هالقصة هي بتروح لعند العريف احمد عاطف بتعرفو المنتج لأ بعرف مدير مكتبو عاطف أستاذ الخوف بحالتنا طبيعي ، انت خايف من العرض ، المخرج ونحنا خايفين ع لعرض... يالله عاطف جاهز جاهز سيدى عاطف الضربات الثلاثة التقليدية ، روح ورا المسرح ، على مهلك المخرج لحد هلاً ما فهمت ليش هالضربات الثلاثة قبل افتتاح أي عاطف مسرحية لحتى يستعد الجمهور للعرض ، يللي عم يدخن ، يللي بره ، المخرج يللي عم يحكي مع جارو ، ويلني نايم بيفيق ، هادا تقليد متبع من أيام سوفوكليس لليوم بكل مسارح العالم

عاطف خير انشالله

«يختفي عاطف ورا الكواليس ، والكل مستنفر ، والمخرج كعادته يحمل عصا مايسترو ، وكأنه يقود فرقة موسيقية بانتظار اشارة البد ، وفيما الجميع بحالة ترقب وانتباه تدوي ثلاث ضربات قوية من ورا الكواليس تتبعها دقة رابعة ، فخامسة ، فسادسة الخ ، بحيث يهتز الديكور ، ويجفل الممثلون ، ويترنح المخرج والمنتج ، وتتساقط بعض قطع الاكسسوار على أرض المسرح »

المخرج ولك عاطف جنيت

«الضربات تتوالى »

المخرج شربان شي ، آخد شي ، زعلان من شي ، قلتلك ثلاث ضربات مو عشرين راح تهد المسرح

جولييت طيرلي الكحلة من عيوني

روميو وأنا نساني الحوار، واسم المسرحية شو اسم المسرحية أستاذ؟

المخرج أنا بعرف؟

«يخرج عاطف وبيده مطرقة صغيرة »

المخرج عجبك هيك

عاطف یا استاذ إذا بثلاث حروب وعشرین حصار وغزو واجتیاح ، من غیر الفراطة مافاقو ، بدك یاهن یفیقو بثلاث ضربات بمسرح بآخر الدنیا ومن وراء الكوالیس ؟

المخرج هادا مو شغلك

روميو يقظة الشعوب بدها وقت

المنتج هلا كنا عم نحكي . ما بدنا سياسة ، بعدو عن السياسة

ببوس إيدكن هلأ كلمة افتتاح كنا راح نروح فيها أمرك أستاذ عاطف حسابك بعدين ، يالله ستارة ، إضاءة المخرج شو ستارة إضاءة ، نسينا أهم شي عاطف شو نسينا ؟ المخرج الوقوف دقيقة صمت عاطف على شو ؟ المخرج على أرواح الشهداء عاطف انشا لله بوقف على قبرك ، ليش الوقوف دقيقة صمت على المخرج أرواح فلان وفلان مانا بمهرجان خطابي أو انتخابي أو ذكري احتلال أو استقلال نحنا بافتتاح مسرحية غرامية مابيصير هيك الأصول عاطف لإيمتي بدنا نضل نوقف ع لاطلال ما بعرف المخرج معلش أستاذ الشهداء بيستاهلو اكتر من هيك بكتير المنتج شرف وقف واحكي أنا ما بعرف المخرج أرجو من الجميع الوقوف دقيقة صمت حدادا على أرواح عاطف الشهدا، وخاصة الفنانين العظام في كل أرجاء العالم من أمثال شكسبير وبريخت وبيراندلو ، وبيتهوفين وفاغنر وفريد الأطرش وشو دخل فريد الأطوش بالشهداء المخرج بعدين بتعرف والتاريخ بيعرف عاطف لأبدى أعرف المخرج هادا موضوع طويل بعدين منحكي فيه ، المهم : وقد كنت عاطف

أتمنى لو نستطيع الوقوف لادقيقة أو دقائق بل ساعات على أرواح زملاء لنا في المسرح والصحافة والفن والإعلام يتساقطون يوميا في بلد عربي شقيق لانستطيع ذكر اسمه حتى لايقف مسرحيون غيرنا في مسرح آخر كمسرحنا حدادا على أرواحنا قبل أن ينتهي عرض هذه المسرحية ، وشكرا .

شرفة جولييت يغمرها ضوء القمر ، وأشعة النجوم الملونة تسقط على شبح روميو وهو يمد ذراعيه نحو شرفة جولييت في حالة ابتهال صوفى ، مع موسيقى كيتار أو كمان خافتة ترافق الحوار :

روميو

ما هذا الضوء الساطع يتدفق ويتلألأ من النافذة ، انه الشرق انه الغرب ، انه الجنوب ، انه الشمال ونجمته الوحيدة على مرمى من ناظري وقب لاتي ويدي ، انه العالم وشمسه جولييت .

« تطل جولييت »

إنها صامتة لاتتكلم ، ولكن التفاتتها كلام ، انظر كيف تسند خديها بيدها ، آه لو كنت قفازا لهذه اليد التي لامست خدها

«قفاز جولييت الأبيض يسقط متهاويا في الهواء » لم ه ، آه « يسعل »

وحسكة «هامسا»

ويحي لقد سقط قفازي من يدي مع انه ضيق جدا تكلمي أيتها الملك البهي ، إذ أنك تسطعين في هذا الليل الدامس وتحومين فوق رأسي كرسول ذي جناح آت من

جولييت

عاطف

جولييت

روميو

روميو . روميو

السماء

«روميو يلتفت بشكل مفاجئ»

ائله بتبص فين ،

« ومع التفاتة روميو يلتفت الجميع الى انبثاق شخص غريب من

وسط خشبة المسرح ومن بين أرجل المصئلين تصاما ، بثقة وشوق كأنه في بيته وأعز ، وعليه علائم نعمة وبوادر كرش صغير يظهر من سترته المفكوكة الازرار ، بثياب فاخرة دون أناقة وتحت ابطه مصنف ، وبيده دفتر ملاحظات ، وسنطلق عليه من الأن فصاعدا اسم المندوب»

المندوب

«بكل ثقة بالنفس » تابعوا تابعوا ، والله ما حدا بيتحرك من مكانو ، الله يعطيكم العافية

«جميع من على المسرح يتبادل نظرات التساؤل والاستغراب حتى الذين في الكواليس »

المندوب

عم نقول السلام عليكم ، يعطيكم العافية

. .

«مرتبكا» أهلا ... أهلا وسهلا بس مين حضرتك

المخرج المندوب

«يدور في المسوح ، وينظر داخل الكواليس وشباك التذاكر

والي روميو وجولييت »... مين حضرتي ، مين حضرتي

n

«مستمهلا الجواب بيده ، وهو يدون في دفتر ملاحظاته» يا أستاذ العرض شغال

المخرج

بعرف

المندوب

«الممثلون يتبادلون الاستنتاج»

عاطف

يمكن صحافي

أو ضرائب

أو تموين

أو آداب

يعني أخلاقية ، معقولة يكون وصل مستوى تفكيرهن لهون الله يسامحكم ، ولايروح فكركم لبعيد ، أنا مجرد مندوب

المخرج المندوب

لجنة لا أكثر ولا أقل «يغرق في الكتابة » لجنة مسرحية ؟

رقابة ؟

المخرج لجنة متابعة ، لجنة مبايعات ، لجنة أمنية ؟

المندوب أنا مندوب وعضو في المنظمة العربية العليا لتطوير وتحرير

المسرح التابعة للجامعة العربية ، وهي كتاب تكليف رسمية المخرج إلى من يهمه الأمر ، يرجى تسهيل مهمته ، أوراق رسمية

ما فيها شك ، بس شو السبب ، ليش اخترتونا النا بالذات

المندوب كلو خير

المنتج أهلا وسهلا تفضل ع لصالة ، عاطف دبر للأستاذ كرسي بالصف الأول

المندوب لا لا بفضل ابقى هون ع لمسرح قريب من النص

المنتج هيك راح تضل واقف

المندوب لالا ، راح اقعد ناولني كرسي يا ابني

عاطف «يقدم له كرسيا» هادا الكرسي كان يقعد عليه نجيب الريحاني

المندوب مؤلف المسرحية

المخرج لا ، المسرمية من تأليف شكسبير ، سمعان فيه

المندوب طبعا معروف من قبلنا والو إضبارة عنا ، تابعوا العمل رجاء . وكأني غير موجود ، أنا ماني غريب اعتبروني من الأسرة

المنتج هادا شرف كبير النا ولشكسبير

المخرج كيف شايفلنا الشغل

المندوب جميل ومريح ، تابعو تابعو موفقين

جولييت ايه روميو

روميو اواه جولييت

المخرج لحظة يا جماعة ، لنعرف شو القصة

«المندوب مستمر في الكتابة»

المندوب يا جماعة لا يروح فكركم بعيد أنا مهمتي اكتب تقرير عن

المسرحية لا أكثر ولاأقل

المخرج يعني تقرير أمني

المندوب ولك يا أخي ليش بتنقزو فورا وبتتوجسوا من رجال الامن . صدقوني بيحترموكن كتير ، وبيحبو الفن أكتر ما بتحبوه

انتو ، والدليل ، الصالة مليانة رجال أمن

المخرج هدول يلبي بالصف الاول؟

المندوب لأموزعين

المخرج لكن مين هدول العابسين وقاعدين متل التماثيل بالصف

الأول؟

عاطف سيدي هدول تجار بسطرما

المخرج بسطرما ، ومخابرات ، وروميو وجولييت ، اعربلي ياها

المندوب ليش ملكين ومزعوجين في شي؟

المخرج أبدا أبدا ، المهم انت ما تكون مزعوج ، لانو العرض لسه

بأولو ، كيف شايفو لحد الآن

المندوب ممتاز ، النص ممتاز ، المقاعد مريحة ، والصوت واضح ، والإضاءة شاعرية ، والممثلين ما عليهم حكى أبدا

المخرج «باعتزاز» والديكور ما لفت نظرك ؟

المندوب معقولة ؟ أول مالفت نظري الديكور ، بس لشو بيرمز ، شو بيمثل

المخرج بيمثل حارة جولييت وبيتها بإمارة فيرونا الإيطالية

المندوب بس إلى ملاحظة صغيرة ياريت تسمحوني فيها مجرد راي

المخرج تفضل ولو

المنتج نورنا

المندوب الديكور رغم جمالو واتقانو ناقصو شي اساسي

المخرج شو هوي؟

المندوب الطابع العربي للبيت والحارة

المخرج بس أحداث المسرحية بتدور بإيطاليا

المندوب ولوكان

المخرج ما فهمت

المندوب يعني باعتبار المسرحية عم تعرض ببلد عربي ، وبلغة عربية ، والمستنين عرب ، والمشاهدين عرب ، فليش الديكور مابيكون الو طابع عربي

المخرج يعني نغيرو؟ ما في وقت

المندوب لالا موهادا قصدي ، قصدي ياريت لو بالامكان اضافة لمسة مميزة من بينتنا ، وواقعنا وثقافتنا وتقافيدنا المعروفة ، ويللي بيحس فيها أي مشاهد لما بيكون بأي حارة أو أي مدينة عربية

المخرج شو ممكن ينضاف للديكور بدون ما نسي الجو الدرامي بالمسرحية

المندوب ولو أي حركة أي لمسة توحي بالجو يللي تحدثت عنو... ولشو ها لفراغات هون ، وهون

المخرج فهمتو شي يا جماعة أنا ما فهمت ، وانت كأنك خجلان تقول شو بدك

عاطف أنا فهمت

المندوب الحمد لله فيه واحد منكن فهم على

عاطف لعيونك أستاذ

«يغيب عاطف وراء الكواليس ويعود حاصلا تنكة قصامة وفضلات ، وسطل دهان وفرشاة ، يفرغ محتويات التنكة على أحواض الزهور هنا وهناك ، ويبعثرها تحت الشرفة حيث يقف روميو ثم يغمس الفرشاة في سطل الدهان ، ويكتب بخط رديء ولكنه واضح : كلب ابن كلب كل من يبول هنا ويرسم وردة صغيرة على كل من جانبي الجملة »

المندوب برافو هي اللمسة المفقودة

عاطف جيب كمان

المندوب لا لا بيكفي ... تابعو التمثيل اذا بتريدو

«المخرج والممثلون يتبادلون النظرات»

المخرج بيظهر حضرتك بعدك راكب الموجة الواقعية بالفن

المندوب لا ... أنا راكب مرسيدس

المخرج تهانينا

المندوب شكرا ، يالله شبكن ساكتين ، سمعونا غزلكن الرفيع ، يا أخي مافي أروع من غزل شكسبير ، شعر ، شعر حقيقي ، وبعتقد هادا أحلى مشهد بالمسرحية

طبعا طبعا ، يالله شباب ورجونا همتكن ، ليش جامدين المخرج «روميو وجولييت يتبادلان النظرات من السلم إلى الشرفة ويتابعان المشهد وكل منهما يسد أنفه ويشيح بوجهه عن الاخر استنكارا للجو الجديد خاصة وان البعوض أخذ ينز ويطن حولهما » روميو ، روميو ، هل تسمعني يا حبيبي ؟ ما بك ؟ لماذا لا جولييت تجيب انت بعيدة مانك شايفة شي ولاعم تشمي هاللمسة الرائعة روميو طلاع كام درجة جولييت « روميو يحاول الصعود » «بحزم» محلك ، ما بتغير حركة واحدة ولاحرف واحد من المخرج النص لا بالزمان ولا بالمكان أستاذ مانك شايف جولييت شايف بس ماني ساكت بعدين بتشوفي ، تابعو المخرج أووه لماذا انت روميو ، ولست شخصا آخر ، أنكر أباك جولييت وغير اسمك واقسم على حبك «مع زيادة الطنين والأزيز » على شو ؟ روميو على حبك... على حبك جولييت «وهو يتفادي بيده البرغش المحوم حول رأسه» أمرك روميو وأنا لن أنتمي إلى عائلة كابوليت ، ويحي اسمك وحده جولييت خصمي ، أنا لست من عائلة مونتاغو ، حتى لو حمل روميو غير اسمه تبقى فضائله . « وهو يتفادى البعوض الوهمي ورانحة المبيدات الحشرية التي روميو

بدأ عاطف ببخها على روميو بإسرار وتشف»

ويحي سمني الحب «لعاطف» بيكفي «لعاطف» بيكفي «لعوليت» لقد كرهت أبي لاني أرى فيه عدوا لك ، وكرهت عائلتي وأصدقاني... ودوري

«لعاطف» بورجيك

المندوب بدون حكي عاطف «لروميو» شو دخلني اللجنة هيك بدها ، بتريد رش اللجنة جولييت قل لي بربك كيف أتيت إلى هنا ، أما رآك أحد من أهلي روميو لقد قتلتهم جميعا ثم تسلقت الجدران فوق أجنحة الحب الخفيفة

جولييت سيبقى منهم من ينتقم منك ، ومن أحفادك وأجدادك وأجدادك وأقربائك

روميو وسيبقى من أجدادي وأحفادي . وأقرباني وأولادي من ينتقم من أجدادك وأحفادك وأولادك

«المندوب يتثاءب وهو يكش بعوضة وهمية عن وجهه»

جولييت «للمخرج» ممكن نختصر المشهد شوي لانو روميو هلك من القرص ؟

«عاطف مستمر في استخدام المبيد حيث أتيح له في جميع أرجاء المسرح، ثم يستعمل ملطشة ذباب بين الحين والآخر» النص مقدس لا يمكن

جولييت معقولة غزل وبرغش . بصراحة أنا ماعدت أعرف اشتغل . من غير شي أنا ملبكة بتيابي وبماكياجي

المخرج

المندوب «متثانبا» يالله انتقلو للمشهد الثاني ، أخدت فكرة على كل

حال

«يدون بعض الملاحظات في دفتره»

انشا لله نال الرضى مع انو ما خلص بعد

المندوب مو مهم ، يعطيكم العافية

المخرج المشهد يللي بعدو

عاطف سكوت

المخرج

«تتغير الإضاءة ويفسح مجال بسيط على الخشبة لاداء المشهد

التالي يدخل تيباليت أحد أقرباء جولييت شاهرا سيفه»

تيباليت أين هذا الروميو لاقطع رأسه وأدحرجه في شوارع فيرونا

واجعله طابة يتقاذفها الصغار قبل الكبار بأرجلهم

«يدخل وراء الكواليس»

«يظهر مركشيو أحد أقرباء روميو ومعه سيف وبلطة»

مركشيو وأين هذه الجولييت ، وراء أي جدار ، أو في أي وكر

تختبئ ، اقسم بهذا السيف الماضي ، وبهذه البلطة القاطعة ، لأخرجها من حيث هي واقطعها إربا إربا

هدئ روعك أيها الأمير

مركشيو مستحيل

عاطف

المندوب «متثانبا » بيكفي المشهد يللي بعده

المخرج ما بيصير المشهد بعدو بأولو

المندوب أخدت فكرة ... يالله ورجونا المشهد الأخير وخلصونا

المخرج مستحيل لسه في تطور أحداث وتصاعد درامي بالإخراج

والأداء والصوت والإضاءة

المندوب أكيد أكيد ، بس الوقت سرقنا «يتفاءب» شو المشهد يللي

بعدو ؟

المخرج راح تشوف المشهد بعينك ، يالله شباب كل واحد لمحلو المندوب مابظن في داعي لتمثيل المشهد أو غيرو ، ياريت تحكيلي ملخص القصة وتريحني

المخرج ليش ما بتعرفها

المندوب مبلى ، بس نسيانها ، شغلي كتير وفوقها حملوني المسرح العربي كلو على ضهري

المخرج الله يعطيك العافية القصة ومافيها بعد ما شاعت قصة حب روميو وجولييت وانطبلت فيها فيرونا كلها

المندوب مين فيرونا

المخرج

المخرج بلد روميو وجولييت يللي بتدور فيها أحداث المسرحية المندوب أيوه أيوه شو بيصير بعدين

بيعلقو العائلتين ببعضهن ، وكل يوم قتيل من عائلة روميو أو قتيل او تنين من عائلة جولييت ، ولما بتشوف أنو الصلح بين أهلها وأهل روميو مستحيل ، وحلمها بالحياة مع حبيب العمر من رابع المستحيلات ، بتقرر تنتحر وبتشتري قنينة سم من الصيدلية ، ولما بيسسمع روميو انو جولييت انتحرت ، بيشتري هوي كمان قنينة سم وبيروح ع لمقبرة وبينتحر وبيرتمي على صدر جولييت ، لكن بعد ما انتهى مفعول السم بجسم جوليت وبتفيق وبتلاقي روميو منتحر على صدرها ، بتاخد القنينة من ايدو وبتنتحر مرة ثانية وبترتمي ع صدرو

المندوب «متثائبا » يالطيف

«بحماس» طبعا هادا المشهد وحدو بالمسرحية كلها ، لهلا الناس بتبكي فيه بكل مسارح العالم ، «مناديا » عاطف

نعم سيدي

المخرج

عاطف

المخرج

عاطف

المخرج

المخرج

المندوب

المخرج

المندوب

المخرج

المندوب

جولييت

المخرج

المندوب

وزعت محارم ع لمشاهدين ؟

نعم سيدي ، بس مخطوا فيها وكبوها

عجيب

المندوب وبعدين

أنا بعرف «يشعل سيجارة ويبدو مبلبل الفكر »

وبعدين استاذ

وبعدين بيدفنوهم بقبر واحد كرمز للحب والوفاء والتضحية

الله يرحمهم ويرحمنا جميعا

منتابع العمل

طبعا طبعا ما بدها وقفة ، بس الى ملاحظة صغيرة

الله يجيرنا من ملاحظاتك

اتفضل اتفضل

«ثم يقطع المسرح جيئة وذهابا صامتا مفكرا والممثلون ينتظرون ما سيقوله بملل وفضول »

ما في شك عمل ممتاز واخراج رائع وأدا، لاغبار عليه لكن مع الأسف على مضمون سخيف وقصة أكل الدهر عليها وشرب الحب الطاهر البري، امام الجهل وخلافات الاهل يللي الاذاعات والتلفزيونات الغربية الها بتعلك فيها خمسين سنة هنف.

بعديين معقولة بزمن المدارس المختلطة والكاباريهات

المختلطة والاحزاب المختلطة حدا بيوقف ساعتين بطقة الشمس او تحت المطر ليقول لحبيبتو كلمة او يلمحها لمحة المخرج

بس زمان المسرحية غير زمانا

المخرج طيب تركونا من الحب والغرام والعلاك الفاضي . كمية الدم المندوب وانواع العنف بالمسرحية ما لفتت نظر حدا فيكن ؟ قتل وضرب وسيوف وبلطات وخناجر بصراحة كل مسرحيات شكسبير مو ناقصها غير الكاراتيه والجيدو ، ولو كانت

موجودة لاستعملها

هي معك حق فيها شكسبير عنيف اكتر من اللازم وبعدين كل مسرحياتو دسائس واغتيالات ومؤامرات على الحكام والملوك والامراء ليش بيكره الحكام له الدرجة مابعرف ؟

> حقود . عاطف

المخرج

المندوب

متحجر . المندوب

شكسبير متحجر ؟ الله يسامحك المخرج المندوب

طبعا ، دول المحور والحلفاء اتصالحو ، الشرق والغرب اتصالحو ، الهند والانكليز اتصالحو ، الهند وباكستان اتصالحو ، الانكليز وايرلندا اتصالحو ، القبارصة والاتراك اتصالحو ، البيض والسود بجنوب افريقيا... ودول البلقان اتصالحو . ولك الالمان حرقو اليهود وعملو منهن صابون ليغسلو فيه ايديهن ورجليهن وبعدين اتصالحو وعايشين متل السمن والعسل .

والله يمكن اليهود ليعملو منا شامبو جولييت ما بظن بها الحالة عمرو ما لح يطلع لانسان شعرة براسو او عاطف بدقنو يللي بقصدو العالم كلو تصالح وعم يتصالح مع بعضو ، المندوب وشكسبير ما بدو حدا يتصالح مع حدا لابد الأبدين شو قصدك استاذ لوين بدك توصل المخرج بصراحة أهل روميو وأهل جولييت لازم يتصالحو المندوب «مذعورا» يتصالحو المخرج وينسو الماضي ويفتحو صفحة جديدة ، لانو في معطيات المندوب عربية ودولية جديدة وتوازن قوى لازم تاخدوها بعين الاعتبار مستحيل . ومشهد الانتحار ؟ المخرج روميو وجولييت بدل ما ينتحرو بيتجوزو المندوب هيك خبط لزق المخرج لا بيجتمعو مع اهاليهم وبيعقدو مؤتمر صحفي بيوضحو فيه المندوب كل شي ، وبيحددو كتب الكتاب والعرس في عرس كمان المخرج وللصبح المندوب أبو ماهر لانو المسرح فرح وبهجة وحبور وبهالحالة شو بيكون بقى من شكسبير المخرج يا أخى كتير مصر على شكسبير المندوب المخرج يا سيدي منكتب اعداد شكسبير المندوب

المخرج

ما عم اقدر اتصور هالدراما الانسانية تتشرشح هيك

أرجوك تركلي العواطف الانسانية الي أنا بتكفل فيها	المندوب
بعدين النهاية النهاية يللي يللي بكت العالم خمسة قرون	المخرج
ولهلا عم تبكيه تصير هيك	
ونحنا بكينا كتير ، وماحدا بيقدر يزاود علينا بهالموضوع ،	المندوب
بعدين ما حدا بيبكي على طول أو بيضحك على طول ، شو	
قلت ؟	
شوف الشباب	المخرج
«ويبقى واضعا يده على خده منفردا عن الآخرين في زاوية	
المسرح •	
شو رأي الشباب	المندوب
يسقط المسرح التجاري	عاطف
يسقط يسقط يسقط	الجميع
يعيش المسرح الطليعي	عاطف
يعيش يعيش يعيش	الجميع
المسرح فوق الجميع	عاطف
المسرح فوق الجميع	الجميع
لحظة لحظة يعني فوق الحكومة	المنتج
فوق الحكومات كلها	عاطف
هلاً خرب بيتي	المنتج
أحسن ما يخرب المسرح ، عاش هملت	جولييت
عاش عاش عاش	الجميع
يسقط تاجر البندقية	روميو
يسقط يسقط يسقط	الجميع

عاطف عاشت جولييت حرة مستقلة

الجميع عاشت عاشت

المندوب «لعاطف» حتى أنت يا بروتس

عاطف دخيل عينك ما تواخذني ، لأني الي زمان ما سقطت ولا

عيشت حدا من قلبي

المندوب لحد هلا ما فهمت شي ولا وصلنا لشي ... انتو مع مين

الجميع مع المخرج

المندوب وحضرتك مع مين

المخرج أنا مع النص

المندوب عظيم وين النص

المخرج مع الملقن

المندوب وين الملقن

المخرج تحت

المندوب نادولو

المخرج عاطف

عاطف نعم استاذ

المخرج نزيل لتحت ونادي للملقن وخلي يجيب النص معو

عاطف حاضر

«عاطف يفتح الكوة المخصصة لخروج ونزول الملقن ويرفع غطاءها واضحا ثم ينزل ، ونسمع وقع أقدام تهبط درجا خشبيا... وبعد فترة عاطف يمد رأسه فقط من الكوة وسط المسرح»

عاطف ما في حدا

المخرج دور منيح هون هون

عاطف ما في	ا في
المخرج ع ليمين	ليمين ، ع ليسار
عاطف سيدي م	ليدي ما في حدا
روميو بدويكو	دو يكون فوق
جولييت وين فوق	ين فوق ما في حدا
المخرج دوروهو	ورو هون هون بالكواليس ، وين بدو يطير
جولييت يمكن	مكن خطفوه
عاطف سيدي و	ليدي والله ما بدها ملقن ولا شي ، كل واحد حافظ دورو
المندوب شرفو اذ	سرفو اذن
المخرج على شو	ىلى شو ع الرقص والدبكة
المندوب ما فيها	ا فيها شي منعمل تصويت
	يش نحنا ببرلمان ؟
جولييت بكل شم	كل شي في ديموقراطية الا بالفن والابداع ، هلا معقولة
يكون م	كون صوتي انا متل صوت نوفة البدوية وفرقتها
روميو أو صون	و صوت عبد الوهاب متل صوت عمرو دياب
المخرج او صوت	و صوتي انا او هتشكوك متل صوت حسن الامام
جولييت نحنا الف	حنا الفنانين كل واحد برلمان لحالو .
المنتج «للمند،	«للمندوب» سيدي المشاهدين ضاجو ، وتأخر الوقت ،
وبكره	وبكره الصبح عندهن أشغال بتتعطل مصالحهن
المندوب ما حدا	ما حدا بيطلع وما تخلص المسرحية
المنتج اتفقتو	تفقتو ع لتعديلات ، شو بدكن تغيرو ، شو بدكن تخلو
المندوب لسه	ه
المخرج تعديلا	تعديلات ما في ، تغييرات ما في

المندوب تفضل لجوه لنتفاهم... كل شي بالحوار ممكن المخرج تفضلو شباب «يدخل الممثلون الى غرفة الاجتماع ويبقى عاطف في شباك التذاكر» التذاكر» المشاهد العجوز هلا أكيد المسرحية ما فيها تزليط ؟ عاطف هلاً مو شاغلك غير هالموضوع ؟ كام بطاقة بدك ؟ المشاهد العجوز ممكن آخد فكرة عن الاسعار

عاطف بتصور درجة ممتازة قدام مجانا ، ووراها بخمسة ، وورا بخمسين ، وورا بحية ، والصف الاخير بألف ، أما المقاعد يللي جنب الباب أو مخرج النجاة بألفين ... مو قدرتك

الزبون بعرف بالسينما قدام أرخص من ورا أما بالمسرح أول مرة بحياتي بسمعها ، فيك تفهمني ليش

عاطف تطور جديد

الزبون طيب والدفع بالعملة المحلية ولا بالدولار ، ولا الدينار

عاطف ما بعرف ، لنهاية المسرحية يمكن تتغير العملة كمان

الزبون شكرا

عاطف مع السلامة

«ثم ينزع لائحة الاسعار القديمة ويعلق بدلا عنها لائحة جديدة كتب على يمينها : أسعار الدخول وعلى يسارها : أسعار الخروج ثم يعود الى مكانه في شباك التذاكر

تفتح غرفة الاجتماعات ويخرج المندوب والمخرج وضجة الاصوات المتناقشة والمختلفة حتى الآن »

المندوب معقولة أهل روميو وجولييت يتصالحو ونحنا نضل مختلفين

انت ما تركت للصلح مطرح : المأتم عـرس ، والانتـحـار	المخرج
دبكة ، والشرفة بيت مونة ، والتابوت طاولة والكفن برداية	
أخي هادا الحكي مو من عندي ، وهي كتاب طويل عريض	المندوب
من الجامعة العربية عم تطلب تسهيل مهمتي مو عرقلتها	
طيب شو بدها الجامعة العربية منا او من غيرنا	المخرج
ما بعرف ، مركزة كتير بهالفترة على الفنون والمسرح ،	المندوب
وخاصة مسرحكم	
بالذات	المخرج
هي الكتاب قدامك	المندوب
هي معطيات جديدة ماكنت بعرفها	المخرج
" أي هلاً عرفتها	المندوب
تفضل عمول يللي بدك ياه وهي الطاقية ، وهي الغليون	المخرج
أعوذ بالله العين ما بتعلاع لحاجب ، وانت استاذنا وتاج	المندوب
راسنا	
مبدنيا خليني مستشار ، دراماتور لحتى اقتنع	المخرج
أي منصب ، المهم تكون جنبي وتاخد بايدي	المندوب
طيب طيب ، وهلاً شو عندك؟ أي مشهد؟	المخرج
المصالحة بين أهل روميو وأهل جولييت	المندوب
اذا بدك مصالحة ، وتقنع المشاهد فيها ، بدك ممثلين ونحنا	المخرج
عددنا محدود ، اعتمادنا الدرامي كلو قائم ع لرمز والايحاء	
الممثلين موجودين ، مفاجأة فنية ما بتتوقعها	المندوب
وينهم ؟	المخرج
أعضاء اللجنة تفضلو شباب ، شرفو	المندوب

«يدخل أعضاء اللجنة تباعا ويقفون الى جانب بعضهم وهم مجموعة من الالواح البشرية الضخمة الصامتة والمقطبة بل والمرعبة أيضا

المخرج يتبادل النظرات مع من حوله»

المندوب بعرفك على أعضاء اللجنة

الاستاذ الدكتور أبو ماهر ولد يوم خمسة حزيران والاخ الدكتور أبو نوار ولد يوم لمات عبد الناصر الاخ الدكتور أبو بسام ولد يوم اجتياح لبنان والاخ الدكتور أبو قصي ولد يوم حريق المسجد الاقصى

والاخ الدكتور أبو مضر ولد يوم ايلول الاسود

المخرج «يتفحصهم واحدا واحدا كالقائد العسكري ثم يتوقف أمام آخرهم» والاستاذ ليش مشطب وجهو بالطول والعرض

المندوب كان مشترك بمؤتمر بالقاهرة ، وبالصدفة كانت البناية جديدة ولسه عم يشطبوها ، فقامو شطبوه معها ، بس عم يراجع مهندس تجميل

المخرج هلاً هي هي المفاجأة الفنية يللي ما كنت بتوقعها ، هدول بدهن يمثلو مسرحية كلها أمل وفرح وبهجة وحبور

المندوب لا تغرك المظاهر ، بيمثلو كوميديا وتراجيديا واوبرا وباليه ورقص على الجليد

عاطف عفوا استاذ «متنحنحا»

جولييت هاتو الصايغ عاطف بدو يحكي درر

المخرج شو فيه عاطف هلا الراقصات ببلاد بره بيلبسو تياب داخلية

وليش ها لسؤال ؟ المخرج ولاشي ... ثقافة عامة عاطف صغير وأحلامك صغيرة المخرج «للمخرج» وهلاً شو قلت استاذ المندوب بس هدول مسؤولين بيعرفو يمثلو؟ المخرج ولو المسؤولين رب التمثيل جولييت ومعهم كمان كتاب من الجامعة العربية لتسهيل مهمتهم ، المندوب ويللي بدك ياه بيعملوه والاخوان دكاتره بشو جولييت أبو ماهر ما منعرف أنا بدي روح ع لتواليت ، عاطف المخرج عاطف نعم سيدي التواليت بعدو بمحلو ولا تغير كمان المخرج لأ بعدو سيدى عاطف عظيم «يعطيه الغليون والقبعة» تفضل عمول يللي بدك ياه المخرج حتى يرجع الاستاذ بالسلامة راح نعمل فاصل دبكة ورقص المندوب وغنى حتى مايملوا المشاهدين... يالله ابو ماهر... ابو بسام... آنسة جولييت... استاذ روميو شرفو اعوذ بالله أنا ارقص معهن... هي فرقة اعدام... جولييت هلأ بتشوفي وبتسمعي المندوب «وفيما هم يتهيئون للدبكة يصرح أبو ماهر : يا قمر مشغرة...» فاصل

«ويمكن أن تشترك جولييت وفرقة للرقص الشعبي معهم»

«المندوب بقبعة وغليون المخرج ، عاطف ، أعضاء اللجنة... جولييت وروميو بعيدان قليلا كعادتهما عن المجموعة جسديا وفكريا »

المندوب «وهو ينظر الى ساعته» طول المخرج كتير

عاطف قال يمكن ما يرجع وما تخلص المسرحية والمسرحيات يللى بره

المندوب علاك خلينا نبدا ، عاطف ناولني تابوت جولييت ، عملتوه طبعا متل ما اتفقنا

عاطف طبعا ، صارت طاولة محترمة ولابتفكرها أبدا كانت تابوت المندوب عظيم

«عاطف يحضر حاملا التابوت السابق وقد تحول الى طاولة اجتماعات رسمية بكل معنى الكلمة دون أن ينتبه أحد الى ماهو مكتوب على أحد جانبيها (سبحان الحي الباقي) والذي سيكون مواجها للجمهور»

المندوب حطها هون ، بالنص ، بالنص تمام ، «يضغط عليها بكلتا يديه» شو هالخشب هادا ؟

عاطف أحسن خشب معاكس بالبلد

جولييت حتى الخشب معاكس بها لمسرحية

روميو ما دخلنا ، في مخرج وهوي المسؤول

جولييت أنو واحد فيهن

روميو خلصنا

المندوب «مازال يتفحص الطاولة غير مطمئن الى متانتها» انشالله تتحمل خبط لأنو أبو ماهر ماشا، الله كسر ثلاث طاولات

بجلسة وحدة على شو كنت متحمس أبو ماهر

أبو ماهر أنا على طول متحمس ماعاد اذكر

المنتج الله يجيب العواقب سليمة

المندوب سليمة ، سليمة انشالله ، والله لأعملك عرض ببرودواي ما صار متلو عاطف ناولني كفن روميو

عاطف تفضل سيدي

المندوب وهو يفرد قطعة قماش بيضاء على الطاولة... فصلتوه متل ما اتفقنا ؟

عاطف نعم سيدي شلنا طرحة لجولييت ، وهي الغطا ، وزاد مترين تلاتة

المندوب منعملهن يافطات إذا لزم الأمر... ما في شي عنا بيروح «بعد أن ينتهى من فرش الغطاء... ينظر بإعجاب » تمام

عاطف كأنو تفصيل

المندوب

تفضل أبو ماهر قعود هون ، ع راس الطاولة باعتبارك الأمير كابوليت أبوها لجولييت ، وانت أبو نوار تفضل لهون كمان ع راس الطاولة باعتبارك الأمير مونتاغو أبوه لروميو ، وانت مركشيو قعود جنب عمك أبو جولييت ، وانت تيباليت قعود جنب عمك مونتاغو أبو روميو ... وانت أبو بسام هون ، وانت أبو قصي هون ، يعني توزع و ... هون وهون قسبال

أبو ماهر نبدا

بعضكن

المندوب لحظة ، انت أبو ماهر ، بتخبط ع لطاولة : وبتقول انني أعلن من هنا من هذا المكان ، وانت أبو نوار بترد وبتقول : لا

انني اعلن من هناك... من ذاك المكان

يعني من وين

يعني من عند هالطربيزة ، وانت أبو نوار بتقول : في الواقع الحقيقة ، في الواقع ، وانت أبو قصي بتقول : لا ، في الواقع في الحقيقة ، وانت أبو بسام بتقول ؛ العرض قبل الارض وبتدق ع لطاولة

وانت أبو ماهر بتقول : الارض قبل العرض وبتدق ع الطاولة دقة أقوى

وانت أبو نوار بتقول ؛ النظام قبل الارض والعرض والطلب وبتهجم عليه بس ما بتوصلو

وانت أبو قصي بتقول ؛ الله اكبر من الارض والعرض والنظام والفوضى والمسرح والتاريخ والجغرافيا واللغة والرسم والنحو والموسيقى وكل كتاب وفلاسفة العالم ، وأكبر من كل ما فى الوجود وبتركع

هون بالمسرح

طبعا لانو المسرح مقدس كمان

وبها لحالة ما حدا بيسترجي يجاوبك أو يقلك لا ، أو يفتح تمو بكلمة ، وهيك من كون وفينا الموضوع حقو ، وعطيناه بعدو التاريخي والعائلي والمسرحي

وبآخر الاجتماع انت بتقول لا ، وانت بتقول نعم ، والبقية بيقولو نعم ، ولا لحتى يكون كل شي واضح للجمهور

«يدخل فجأة » كتير محترمين الجمهور ما شاء الله

أهلا شفناك تأخرت

أبو نوار المندوب

أبو قصي المندوب

> المخرج المندوب

احترامي معلم عاطف هلا حضرتك صرت مخرج كمان المخرج لا والله سخرة ، بتعرف ما بقدر قول لحدا لأ عاطف كيف شايف المشهد المندوب غلط ، غلط ، غلط ، عائلات راقية ومحترمة وامراء المخرج ومسؤولين محترمين دايرين ضهرهن للجمهور طول عمرهن دايرين ضهرهن للجمهور عاطف رجاء بلا حكى بالسياسة... أبو ماهر وأبو بسام منين المنتج طلعولنا هدول كمان؟ رجاء استاذ المخرج حاضر ، حاضر على راسى المنتج بعدين عائلات مشهورة بعدائها وبيناتهن احقاد وضغائن المخرج وتارات ، فجأة مجتمعين على طاولة وحدة ، وعم ياخدو ويعطو مع بعضهم أي وشو الغلط بالموضوع المندوب يا أخي بيجوز وهني مجتمعين وعم يتحادثو بأمان الله واحد المخرج يتذكر أمو الارملة أو أخوه المشوه... والقاتل قدامو أو جنبو ، يفور دمو ويقتل يللي قدامو ويللي جنبو ويللي وراه ويعبيلك المسرح دم وجثث طيب ما اتفقنا يتصالحو ، مو هيك اتفقنا يا جماعة المندوب بس مو خبط لزق ، بدك شي يقنع الجمهور ، وافضل طريقة المخرج لتلافي ها لنقطة بالذات انهم يتعاتبو ويتناقشو على طاولة

وحدة ، تنين ما في مانع بس بدون ماحدا يشوف التاني ،

والا بيصير المشهد مهزلة

المندوب وشو الحل برأيك ؟

المخرج انت ما صرت مخرج تفضل حل هالاشكال

المندوب بدنا كاتب

لا بدها كاتب ولا قارئ... من طرمشهم

المندوب كيف

عاطف

عاطف

عاطف

عاطف

عاطف منغطي عيون كل واحد منهم بعصابة بكمامة حتى لاحدا يشوفو ولايشوف حدا ولايعرف صديقو من عدوو

المندوب برافو عاطف برافو ، الله مكافأة ، شو رأيك استاذ

المخرج فكرة طفولية ، ومخرج معقول ، لكن وخيم العواقب «يخرج»

«عاطف يقوم فورا ويغطي عيني كل واحد من العانلتين الوهميتين بقطعة من القماش ويحكم شدها حول الرأس»

شو رأيك أستاذ

المندوب تمام

«وهو يوزع ميكرفونات وأوراق ومصنفات أمام كل منهم»

وهي قدام كل واحد ميكرفون كبير وميكروفون صغير بياخدو معوع لبيت ، بلكي طلعت لأي واحد منكم فكرة جديدة وهوي نايم بيقوم بيتمرن عليها ، لأنو كل يوم

عندكن عرض جديد قدام الجماهير لتخلص المسرحية

المندوب عظيم

وهي نسخة لكل واحد من ورقة العمل ، ومصنف فيه كل الخلافات وتواريخها وأسبابها وعدد الحروب وضحاياها .

وطرق وقفها ومعالجتها ، وهي توصيات ، وهي بيان مشتر ك بدكن تناقشوه كلمة كلمة وحرف حرف قبل ما توقعو عليه وتتصالحو

«ثم يضع نظارات طبية فوق عيونهم المغطاة بعصابة سميكة من القماش بحيث يغرق كل منهم في ظلام »

جاهزين

جاهزين للبيض والبندورة

رجاء آنسة جولييت ، إذا بتريدي

«افراد العائلتين يتصفحون الاوراق التي أمامهم ويقربونها ويبعدونها عن عيونهم ويمسحون نظاراتهم كما لو كانوا يرون كل شيء »

يالله لنشوف

في هذه اللحظات التاريخية أعلن من هنا «يخبط على الطاولة» في هذه اللحظات المصيرية أعلن من هناك «يخبط على الطاولة»

رجاء يا اخوان تهدو الجو شوي ، وبدون استفزاز وتجريح ، كل انظار العائلات والعشاق مشدودة الكن وايديهم على سيوفهم أو قلوبهم بانتظار نتيجة هالاجتماع ، ولذلك بدي اقصى درجات الهدوء وضبط النفس... موفقين ومسرح حتى النصر

«ويرفع اصبعيه عاليا باشارة النصر المعروفة»

«المتخاصمون يتجاوبون مع دعوته للتهدئة ، وينصرفون الى تقليب الاوراق التي أمامهم وقراءتها تمتمة ، مع كتابه ملاحظات

جولييت

المندوب

أبو ماهر أبو نوار

المندوب

على هامشها او على دفاتر خاصة بذلك ، وبعد فترة » أنا شايف أسباب الخلافات مو واضحة أبو ماهر أنا شايفها واضحة كتير... ما في أوضح من هيك تيباليت بس فيها حشو ولغو ما الو نهاية مر کشیو تجاوزوها المندوب أنا شايف فيه تفصيلات كتيرة عم تغطى الجوانب الفرعية ، أبو بسام شوف كيف مغطايتها ، وتترك الجوانب الاساسية بالعكس أنا شايف التفصيلات ضرورية لتوضيح الموضوع أبو قصى الاساسي هلأ ضروري نتلهى بالقشور ونترك اللب مركشيو أبو قصى أنا عم دور ع للب ، وينو ، وينو «يقرب الاوراق من عينيه» أبو نوار معقولة هالحكي يا جماعة «لجاره» شوف بعينك شوف شایف شایف تيباليت أنا بشوف نبدأ من أسباب الخلافات أبو قصى لا لا أنا بشوف نبدا من نتائج الخلافات لانو الاسباب أبو ماهر أبو نوار والنتائج معروفة وين صرنا يا جماعة المندوب أنا باقيلي صفحتين أبو بسام أنا صفحة وحدة أبو قصى شو أبو ماهر بعدك بالصفحة الاولى من المقدمة «يقرب المندوب الاوراق الى عينيه المعصوبتين » أي أنا عم اقرا بين السطور أبو ماهر

لا بدها لابين السطور ولاتحت السطور ، كل شي واضح	أبو نوار
متل عين الشمس	
أنا بحتج ع لمقدمة «ويلقي بأوراقه وسط الطاولة»	أبو ماهر
وأنا بحتج ع الخاتمة «ويلقي بأوراقه وسط الطاولة»	أبو نوار
وأنا بحتج على التوصيات «ويلقى بأوراقه وسط الطاولة»	أبو بسام
" وأنا بحتج على كل شي «ويلقي أوراقه بعصبية»	أبو ماهر
اختلطت الاوراق متل ما كنت متوقع	المندوب
ما اختلط شي	عاطف
أنا خايف التمثيل يصير جد وما يوقعو مانك شايف أبو ماهر	المندوب
وأبو بسام وأبو نوار راح يجنو ، وحمرت عيونهن على	
بعضهن وصياحهم واصل لبره الصالة	
خدها قاعدة استاذ أكتر واحد بيشد أول واحد بيرخي	عاطف
وأكتر واحد بيحلف أول واحد بيكذب	
وأكتر واحد بينط ، أول واحد بيهرب	
وأكتر واحد بيحرص على كل شي أول واحد بيفرط بكل	
ٿي	
وقعوا هون «يتدافعون على التوقيع والغصابات ما زالت إلى	المندوب
عيونهم ثم يتصافحون كيفما اتفق»	
«يضحك» أي بس بعدنا منكره بعضنا	أبو ماهر
كلها شكليات ، العالم كلو بيكره بعضو ومع ذلك الناس	المندوب
عايشين مع بعضهن وما أحلاهن	
مبروك آنسة جولييت مبروك استاذ روميو	
مبروك علينا كلنا	جولييت

«زغاريد من داخل المسرح وخارجه»

المخرج وهلأشو بقي عنا

المندوب روميو وجولييت بيعقدو مؤتمر مؤتمر صحفي وبيردو على أسئلة الصحافيين

المخرج «ينادي» روميو وجوليت عدو جنب بعضكم

«جولييت تتقدم بتثاقل وعدم اقتناع بكل مايجري وتجلس بامتعاض ، روميو يجلس الى جانبها وكل منهما يشيح بوجهه عن الآخر ترفعا عن الترتيبات المتخذة »

تفضل أبو ماهر ، أبو جولييت ، قعود جنب بنتك من هون ، وتفضل أبو روميو قعود جنب ابنك ، وانتو أبو بسام أبو قصي ، أبو مضر ، تيباليت ، مركشيو ... توزعو هون وهون حوالي العريس والعروس باعتباركم اعمام واخوال واقرباء العروسين ، كيف تمام

والاجتماع المغلق ايمتي

معقول أمير وأميرة وعرس وليلة زفاف ومافي مدعوين وين الخدم والحشم والأمراء والأميرات والوصيفات

المندوب ما فهمت شو قصدك

عاطف

المخرج

عاطف

المندوب

أبو بسام

جولييت

المخرج لحتى يكون المشهد مقنع بدنا كومبارس لحفلة العرس

ولو الشعب كلو كومبارس

قربو من بعضكم شوي... لناخد صورة تذكارية

«لجولييت» قربي لعند عمك شوي

لأ منيح هيك

أبو نوار لا بتقرب لعند خالها... قربي خالو قربي

«صارخة » الله ايه البجاحة دي جولييت وهلا الجميع يوقفو دقيقة صمت حدادا على أرواح قيس المندوب وليلي ، وقيس ولبني ، وعروة وعفراء ، وكثير وعزة ، وعنتر وعبلة وغيرهم من شهداء الحب والغرام « يقف الجميع » هلا هي جوازة ولا جنازة ، حداد بأول المسرحية وحداد جولييت بآخرها والطاولة تابوت والطرحة كفن ، بعدولي ... «تحاول الخروج » طولي بالك ما في داعي للزعل المندوب طولى بالك بابا أبو ماهر تعى لعند عمك تعى أبو بسام سيبوني الله جولييت قربى لعند ابوك قربى ولا يهمك أبو ماهر أبو نوار لا لعند حماك موهيك عمو ابعدو عنى يا غجر يا نور يا حوش يا لمامة جولييت جولييت ، ليش هالتصرف ؟ مالك بالعادة المخرج بيعاكسوني يا استاذ ولا عامل مش واخد بالك جولييت عيب يا جماعة احترمو زميلتكن المخرج عفوا بدى اسأل سؤال من زمان هلا حضرتك مصرية المندوب لا طبعا جولييت لكن ليش كل كلمة والتانية بتحكى مصري المندوب جولييت مزاج ، انت اخو کیفی «ينتحى بالمندوب جانبا » هادا يا سيدي مرة كانت مسافرة

عاطف

وغطت طيارتها بمطار القاهرة ، ليعبو بنزين أو يبدلو الركاب مو أكتر ، ومن ساعتها صارت تحكي مصري متل مانك شايف ، وياريت عم يظبط معها... بس شو ما حكت بتضل فنانة كبيرة وبتجنن

المندوب المخرج

المندوب

«للمخرج» مظبوط هالحكي يا استاذ

«باللهجة المصرية دون انتباه» وأنا مالي ؟

«مصطادا في الماء العكر» لا لا ، هي ظاهرة خطيرة إذا تفشت بين الفنانين ، هلا هي عم تحكي مصري ، وبكره روميو بيحكي سوداني ، وابوه خليجي ، وابوها مغربي ، ومسرحية ورا مسرحية ، وسنة ورا سنة بتنقرض اللغة السريانية والآشورية

المخرج

معك حق ، هلا معظم الفنانين والمشقفين والسياسيين والناخبين ماعاد حكو عربي الا للضرورة ، كلو عم يدرس لغات أجنبية ، انكليزي فرنسى روسى طليانى

بس بهالفترة الاخيرة الكل عم يدرس اسباني

وليش اسباني بالذات

قال يمكن كمان نرجع الاندلس بالمفاوضات شو رأيكن سيدي نكمل المسرحية بالفصحي شو رأيك آنسة جولييت

انشالله تكملوها بالتركي أنا بطلت التمثيل

عم تحكي جد

معقول هالحكي

معقول ونص ، عاوزة ارتاح منكم ومن قرفكم

عاطف المندوب عاطف أبو بسام المندوب جولييت المندوب المخرج

وين بدك تتركينا ونحنا بنص العمل عاطف ما اقدرش جولييت إذا مو لخاطري... كرمال المنتج المسكين المخرج ما اقدرش جولييت منشان المشاهدين عاطف ما اقدرش ، ما اقدرش جولييت «تنسحب باتجاه الشرفة أو من الكواليس ، كارثة ، كارثة فنية لا تعوض ، لازم حدا يحكى معها المخرج تركها تعتزل ، تعمل يللي بدها ياه ، ما تخلي فنان أو غير المندوب فنان يشعر بانو ما في غنى عنو للعمل ، جولييت ، روميو ، امها أبوها ، لانهم بيصيرو مراكز قوى أنا معك وياما عانيت من هالقصة ، بس هلا في عنا بطلة المخرج وحدة بالمسرحية لدور جولييت وبآخر لحظة اعتزلت، وماعم تتراجع ، منين بدنا نجيب بديلة الها وبطلة بمستواها بآخر العرض وبآخر الليل؟ البطلة جاهزة المندوب وينها ايدي بزنارك المخرج بالصالة عم تراقب ايقاع العمل المندوب كمان من اللجنة المخرج «بافتخار» ورئيسة اللجنة كمان المندوب لا لا لاتقللي ، معناتها الشغلة مدبرة سلفا من ورا ضهرنا المخرج لا وحياتك كل شي عم يصير عفوي المندوب أبو ماهر مسرحية ميسرة شو بدنا نعمل

المهم حلوة خرج الدور المخرج هلاً بتشوفها بعينك ، حلوة ومثقفة ، وأخلاق عالية ، ومعها المندوب شي عشرين شهادة ماجستير ، وبحاثة وبروفيسيرة ، مو متل هالطرطورة تبعكن وبعدين ملتزمة انعم واكرم المخرج «صارخا» وين المدام البروفسورة يا شباب تأخرنا المندوب جاي جاي ، بس عم تحيى المشاهدين ، هه شرفت أبو ماهر أهلا مدام أهلا اللجنة «تدخل المدام وهي تبدو قصيرة ونحيفة وممتلئة الجسم في آن واحد ترتدي ثيابا محتشمة حتى الركب مع جديلتين وشرائط مدرسية على جانبي الرأس بحيث يحار المر، في عمرها وقوامها » . أهلا مدام المندوب «للجميع» يعطيكم العافية المدام «للمندوب» كيف الشغل متل الساعة ، بس واقعين بمشكلة صغيرة المندوب المدام الممثلة يللي عم تلعب دور جولييت ، تركت المسرحية المندوب اعتزلت مابعرف شو قصتها ومعتكفة فوق ، وبدنا بديل الها ، لانو المسرحية ما لازم توقف لاي سبب مهما كان

بدنا بديل لجولييت ولو من تحت الارض

أوامر الجامعة صريحة وواضحة ، وشو راح تعملو

المدام

المندوب

طبعا ، طبعا المسرحية لازم تمشى والا منمشى كلنا ، هيك

أبو ماهر او من فوق الارض «للمندوب» شو ما الك عيون استاذ المندوب شو قصدك

«أبو ماهر يوشوش المندوب»

المندوب شو رأيك مدام تلعبي دور جولييت

المدام «بحياء» رجاء ما تحرجوني

المندوب مضطرين بتعرفي الظروف

المدام إذا هيك ما عندي مانع وين روميو؟

المندوب شو رأيك استاذ؟

المخرج ما بعرف شو بدي قلك ، مدام وجدايل وشرايط ابتدائي ؟

المندوب هي سابقة عمرها بكتير فكريا وفنيا

المخرج ما بعرف أنا شايفها صغيرة

المندوب صغيرة ؟ متجوزة لحد الآن مؤلف ومخرج ومنتج وأربع مشاهدين ، وبعدين معها كتاب من الجامعة العربية لتسهيل

مهمتها ، الكتاب معك دكتورة ؟

المدام تفضل

المخرج «يتصفح الكتاب بسرعة» يلله تفضلوا خلصوني

المدام وين روميو

المخرج جاهز ، شرف استاذ روميو

روميو لوين

مركشيو علمقدور

المخرج يالله استاذ ماعنا وقت

روميو آسف ، بدي استقيل لاسباب صحية

المخرج صحتك متل الحديد

طيب لاسباب نفسية عائلية شو التمثيل بالقوة روميو تركو استاذ تركو ، شو حكينا عن مراكز القوى المندوب «المخرج يلتفت الى مركشيو وتيباليت فيبتعدان مذعورين » ما تقرب علينا مر کشیو ما منعرف غير القتل والضرب تيباليت تفضل دبرلنا روميو بمعرفتك المخرج المندوب روميو موجود مين ؟ ووينو ؟ المخرج ولو أبو ماهر ، أبو بسام ، أبو مضر وين راحو ؟ أي واحد المندوب من اللجنة بيلعب الدور وبتفوق لأهى مؤامرة المخرج ليش المندوب جولييت من عندكن ، وروميو من عندكم ، والاب والام المخرج والقرايبين ، شو بقى النا نحنا عندك حل تاني ؟ المندوب موجود ، «يصرخ بفرح » عاطف وين عاطف المخرج «عاطف يقبل مسرعا من داخل الكواليس أو من شباك التذاكر» شايف الاستقالات شغالة عاطف كل شي عم يسير لصالحك من أول المسرحية لهلاً المخرج خير شو صار ؟ عاطف استقال روميو المخرج عاطف الله لا يردو ولذلك بدي ياك تشد همتك وتتفرغلي كليا المخرج بس لأعمل قهوة للشباب عاطف

تركلي كل شي من ايدك ، وبتروح بتغير تيابك وبتسرح المخرج شعرك وبتلمع سيفك ، بدي ياك تطلع أمير ابن أمير

> لىش ؟ عاطف

حتى تلعب دور العمر متل ما وعدتك ، وهلا اجت فرصتك المخرج عاطف

دور روميو

لكن جولييت ، بسرعة المخرج

«يقفز فرحا» لعيونك استاذ «وهو يبدأ بخلع لباسه باتجاه عاطف الكواليس » وهلا بدي ورجيك وورجى العالم كلو كيف بيكون الحب والغزل والدلع بهالمرحلة

يلله خلصني «ويعود وينضم الى المندوب والمدام واعضاء المخرج

اللجنة »

مشى الحال ؟ المندوب

المخرج

تأخر روميو ؟ ما تأخر ؟ المدام

لا لا عم يجهز حالو ويراجع دورو المخرج

> كيف أعصابك مدام المندوب

> > المدام ولا يهمك

> > > المخرج

اذا بتريدي مدام تطلعي على غرفتك فوق بنهاية السلم على مهلك درجة درجة حتى توصلي لآخرو ، وروميو بيوقف بأول السلم من تحت ولما بتتلاقى عيونكن مع بعضها انت بتنزلي درجة وهوي بيطلع درجة ، انت بتنزلي درجة ، وهوي بيطلع درجة لحتى تلتقو بنص السلم ، وهون بيحملك

المدام على ضهرو على ايديه متل الريشة وبيطير فيك وانت عم تلوحي المخرج للمعازيم والمشاهدين لحتى تدخلو لغرفة النوم وبلكي صار معي شي جوا وانا غريبة هون المدام كل شي راح يصير باشراف اللجنة المندوب ليش اللجنة المخرج بدنا تقارير مفصلة عن كل شي بليلة الدخلة . وينو هادا المندوب روميو ، مافينا نسهر طول الليل على مشهد والمدام عندها ارتباطات كتيرة بكره «ينادي» عاطف شو صار معك المخرج «من الداخل» باقى اللمسات الاخيرة معلم عاطف على مهلو معلش لازم كلنا نسهر ونتعب ونضحي لتنجح المدام المسرحية بسرعة يا عاطف المخرج نازل رش كولونيا مركشيو تيباليت صبر ونال ما سمعتو قديش سأل عن الاجتماع المغلق مر کشیو وهلأ اجا الاجتماع المغلق يورجينا شطارتو تيباليت « يطل روميو بلباس الدور وهو بمنتهى الاناقة كما يفهم الاناقة ، ويحمل باقة ورد ويتقدم نحو السلم المتصل بالشرفة يرافقه تصفيق الممثلين ، وموسيقي دقو المزاهر لفريد الاطرش

أله : الرق ، الطبلة ، المزمار ، المجوز »

بمشاركة اللجنة التي تستقبله أو ترافقه وكل منهم يعزف على

المخرج ممكن بهالدور تدخل التاريخ

روميو المهم ادخل ع حبيبة العمر «ويهم بقفز السلم دفعة واحدة

فيوقفه المخرج »

المخرج درجة درجة

عاطف ما عاد اقدر انتظر

المندوب يالله ورجينا همتك

مركشيو يا عمى هادا روميو مو هداك

تيباليت عطو الخبز لخبازو لو أكل نصو

المدام «تطل من أعلى الشرفة وعليها طرحة العروس البيضاء ، وتنادي

بصوت حالم» روميو

عاطف «وبمجرد أن يسمع الصوت يصرخ» طلع القمر طلع «ويقفز عدة قفزات نحوها وكأنه يريد أن يلتهم الدرج التهاما ولكن عندما يتأملها جاحظ العينين يهز رأسه عدة مرات كمن يستيقظ من كابوس، ويعود بنفس السرعة الى نهاية الدرج وهو ينظر اليها ويفرك عينيه»

المدام روميو ... روميو

عاطف «يعود ويقفز اليها مرة أخرى وعندما يراها يعود مسرعا الى نهاية السلم مبلبل الفكر منقبض الصدر ، غير مصدق ما يرى»

المخرج شبك؟

عاطف مابعرف يللي شفتها مابدها ليلة دخلة... بدها ليلة طلعة

«أغنية وموسيقي دقو المزاهر مستمرة»

المخرج يالله لعندها بسرعة ، ناطرتك

عاطف لحالي

المندوب لكن بدك مرافقة

«المدام تهبط السلم درجة درجة حتى منتصفه وتعود وهي تلتفت اليه بانتظار أن يلحق بها ولكن دون أي تجاوب »

المندوب

مانك شايفها كيف عم تنزل وتطلع متل الحجل ، تحرك

عاطف

يالله ،... وقل لن يصيبنا الا ما كتب الله لنا ، «ثم يتوقف بعد بضع درجات ويجلس مديرا ظهره اليها »

المدام

يا عاقد الحاجبين قتلتني مرتين

المندوب

هه ، بلشت بالشعر جاوبها بالشعر

أبو ماهر

هادا الكلام الصحيح

المندوب

«بعد أن يقدم له رزمة من الدواوين الشعرية ملفوفة بجريدة يومية» :

يومية »

وهي ديوان لنزار قباني وسعيد عقل والاخطل الصغير ، هي ما بيدوبها غير الشعر

عاطف

والله يللي دوب فرج الله الحلو ما بيدبو شعرة فيها «يهمل المجموعات الشعرية وينصرف الى تصفح الجريدة اليومية باهتمام» : هي بينقرالها صفحة الحوادث ، صفحة الوفيات ، الصيدليات المناوبة ، حالة الطقس «صوت رعد وعواصف في الخارج ، ثم يقرا العناوين التالية وهو يقلب الجريدة» :

تلوث البيئة يهدد بكارثة عالمية

أهالي الفوقا يطالبون بمكب نفايات

شاحنة بـ ١٨ دولاب تعانق سيارة فولس فاكن على الطريق العام

مواطن ينطح جاره والشرطة تتدخل بعد فوات الاوان

	زوج يقتل زوجته بجرن الكبة سامعة مدام بجرن الكبة
المدام	شايف القمر يا حبيبي
المندوب	كل ها المشاريع يللي بالبلد ماشفت غير النفايات وجرن
	الكبة
عاطف	جيبولها شاعر انجازات
المندوب	ولك المشاريع يللي عملناها بدها فيلسوف انجازات سو
	شاعر بس شوف بيعينك اوتوسترادات وانفاق بيحسدنا
	عليها انعالم
عاطف	والله انا يللي شايفو كلنا بنفق واحد ما الو نهاية
المدام	شایف القمر یا حبیبی
المندوب	ولك كلمة لفتة حلوة ، وين غزل شكسبير الرائع وعواطف
	روميو الجياشة وين
عاطف	«صارخا» أنا ماني روميو أنا الملك لير ، أنا الملك فاروق ،
	أنا السلطان عبد الحميد ترحمو علي
المدام	شايف القمر يا حبيبي
أبو ماهر	حن على هل العطشان «يلتفت جانبا ويدندن بالاغنية
	المشهورة بصوت خافت » .
عاطف	فهمو على يا جماعة ما بقدر غازل والناس عم تاكل بعضها
	من الجوع ، واللاجئين والمشردين والمهجرين والنازحين
	نايمين تحت المطر والثلج كله من وعد بلفور
المندوب	تحرك ، غيركن صار عنده ولاد وانت بعدك بوعد بلفور ؟
عاطف	خلوه حب افلاطوني
المندوب	ما بيصير ، بدك تحبها وتتجوزها وتنتهى المسرحية نهاية

سعيدة مو هيك اتفقنا ؟	
اتفقت مع المخرج مو معي	عاطف
شايف النجوم يا حبيبي	المدام
والله انا ما رفضت عشرات الادوار وصمت كل هل السنين	عاطف
لافطر على بصلة	
لا تنسى انو البصل من فصيلة الزنبق ، وبعدين رئيسة اللجنة	المندوب
أي تغازلها اللجنة	عاطف
بدك تحبها وتتجوزها والمسرحية بدها تمشي ، ورجلك فوق	المندوب
رقبتك ومسرح حتى النصر	
شايف النجوم يا حبيبي	المدام
بصراحة ، بطلت التمثيل بدي اتحجب	عاطف
حلو والله كنا بالفنانات صرنا بالفنانين	المندوب
هلا هوي ، بكره المخرج ، وبعدو المنتج ، والله يعلم وين	أبو ماهر
بتنتهي السلسلة	
طالما الفن بها المستوى يمكن ما يبقى وجه سافر بها الامة	عاطف
غير وجه ياسين بقوش	
شايف النجوم يا حبيبي	المدام
رد عليها بكلمة بحرف راح ينزلها فتاق	المندوب
«تصرخ صرخة ممدودة» شايف النجوم يا حبيبـــــــي	المدام
ولك ايا نجوم ، وينها ، دليني عليها ، ليش العسكر بها	عاطف
الدنيا خلو نجمة بالسما	
هلأ خرب بيتي ما في كلام	المنتج
قوم ، قوم من هون	المندوب

أبو ماهر تخلي عن رجولتو خزيتنا وسودت وجهنا المخرج قلتلك بعد عن السياسة ما كنت تفهم تفضل شو عملت المنتج بحالك وفينا يا استاذ يللي بدو يبعد عن السياسة بها لبلاد ، متل يللي عاطف بدو يبعد عن مرتو وهو نايم معها بتخت مفرد ، من أول بدي قلك هالشي ما كنت تتركلي فرصة ما بدي نام لا على تخت ولا على صوف ابدي نام ع لارض المنتج بالكواليس لحتى ماشوف حدا ولا حدا يشوفني «يخرج» شلاح هالتياب وبعمرك ما راح تلبسها مرة تانية ، ورجاع المخرج للمكنسة والجاروف دقو المزاهر الممثلون والله لدق رقبتكن « يخرج » عاطف «مستجيرا بمن حوله حتى بأعضاء اللجنة» : يا إخوان في حدا المندوب بيحب يلعب دور روميو ، ما في حدا يا مدام شو عليه... خليني هيك عصفور طيار «تختفي وهي ترفرف المدام بيديها » «ظلام خفيف مع موسيقي هادئة وحزينة » كانت الامور ماشية متل الساعة ، كأنو عين وصابتها المندوب المخرج مين المسؤول سآل حالك ، قال مخرج جوائز المندوب وهلاً شو العمل أبو ماهر بدنا نكفي العرض المندوب أي عرض بدك تكفي وبأي ممثلين ، يللي اعتكف ، ويللي المخرج تحجب ويللي اعتزل منعرض مسرحية تانية ، شو الله خلق شكسبير ورفع ايدو المندوب الليلة المخرج لكن بكرة ، لانو الجمهور ما راح ينسى أي سرحية قديمة المندوب الا بمسرحية جديدة وين بدك تجيب مسرحية جديدة بآخر الليل المخرج أبو ماهر منعمل مسابقة خود التاني المندوب أبو ماهر شو فيها ؟ شغله ما بتفهم فيها ما تتدخل المندوب «روميو وجولييت يسترقان السمع والنظر من خلال الكواليس وبفضول واضح من جولييت بالذات» كأنو حضرتو بيفهم كتير جولييت مادخلنا روميو لأ دخلنا ونص جولييت شو فينا نعمل روميو في متل بيقول لما التجار بيتخانقو ، العتالة يللي متلنا مركشيو بيقعدوع لاكياس بيشربو شاي يا عيني عليك روميو نحنا مانا عتالة ، نحنا أصحاب الفرقة وهني متطفلين جولييت

وصاروا أصحاب الفرقة ونحنا المتطفلين

«الاضاءة على المندوب واللجنة والمخرج»

روميو

المندوب شو قلت استاذ

المخرج شو بدي قول ، بكل حياتي المسرحية ما مريت بهيك مأزق ، ما بعرف شو قول الك أو للممثلين أو للجمهور

جولييت تفضل مخرج الجوائز

المندوب يا سيدي ما بدنا مسرحية جديدة ، بدنا نواة من مسرحية ، مشهد من مسرحية فاصل مسرحي يكون فيه فرح وأمل وبهجة وحبور

المخرج كيف ومنين ؟

جولييت

المندوب مناخد حياة أي بطل او شاعر او فنان عربي من التاريخ الاجانب ما خلو حدا بتاريخهون الا ما عملو عنه مية فلم ومسرحية شو رايكن بالمتنبى بابن زرياب

جوليت بلا تاريخ بلا جغرافية عندي فكرة مسرحية ما بتخرش الميا المندوب تفضلي آنسة جولييت تفضلي

يا سيدي البطلة مرة عربية لا على التعيين ، في أرض عربية لا على التعيين ، بيتها منعزل بالصحراء ، عم تتحمم بالبانيو ، وما راح نشوف غير وجهها وشوي من صدرها وكتافها لانهن مغطايين بالصابون ، وما راح نشوف شي من جسدها لانها قاعدة بالبانيو ، والبانيو متل ما بتعرفو كلو رغوة صابون وشامبو

وبها للحظة يللي بدها تقوم لتاخد المنشفة من العلاقة لتنشف فيها جسمها... بتنطفي الكهربا... وهون من بين للمشاهدين أهمية الطاقة بالعالم والحفاظ على مصادرها ، وبنفس اللحظة وهيى عم تتزحلق بالعتمة بالحمام ، بتنضرب طيارة معادية بالجو ، وبيهبط الطيار بالمظلة بالبانيو ، وبنفس اللحظة يللي بيحط فيها الطيار بالبانيو بتشعل الكهربا ، وهون بيجن جنون البطلة وماعادت تعرف كيف بدها تتصرف ؟ تقبض على الاسير المعادي وتحمي بلدها أو تحمي جسدها ؟ وهون بيدور صراع رهيب بين الجسد والروح والوطن

المخرج بالبانيو

جولييت

المندوب

طبعا وخاصة انها وحدها بالبيت ، ولا بتعرف انكليزي ولا الطيار بيعرف عربي ، لكن باللحظة يللي بينتصر فيها الواجب ع لجسد ، وبتقرر تقبض على الطيار الجريح بتنطفى الكهربا

أبو ماهر هادا الحكي مو معقول مستحيل

جولييت يا خبر ابيض ليه ؟

المندوب لانو ما في دولة عربية الا والها مشكلة مع الكهربا ، وكل دولة لح تعتبر حالها المعنية بالمسرحية

أبو قصي وبعدين بيجوز تجرنا لمشاكل سياسية واقتصادية واجتماعية ، وطائفية ، المسرح ما اله علاقة فيها

المندوب لانو المسرح فرح وبهجة وحبور

ولذلك بدنا قفلة نهاية بسيطة للمسرحية ، يشترك فيها كل الممثلين واعضاء اللجنة وتكون كلها فرح وبهجة وحبور ودبكة وأمل بهالأمة

أبو قصي يعني استعراض غنائي راقص

المندوب عليك نور . مثل استعراض الربيع ، وانتصار الشباب ،

وعفريتة هانم ، وغيرو من هالاستعراضات يللي ما عاد شفنا أو سمعنا مثلها

عاطف عفوا ، بس مین بدو یغنی بدل فرید

المندوب ولو أبو ماهر عندليب اللجنة

عاطف بس أبو ماهر قدو مرتين ، طول وعرض وعضلات بينما

الاستاذ فريد كان جسمو وصحتو على قدو

المندوب أي بدنا نقدم و بشكل جديد طول وعرض وعضلات.

مفاجأة للجمهور ماهيك ؟

عاطف وأي مفاجأة .

المندوب ولك يا أخى ليش أنتو ضد التجديد بالمسرح؟

عاطف بالعكس أنا مع التجديد بالمسرح والسينما والرقص والشعر والموسيقى . ولك حتى بالانتخابات بس يكون مقنع على

اصولو .

المندوب هلاً بس نسمع أبو ماهر ننسى كل أمراض الدنيا . يالله أبو ماهر ، يالله شباب .

«أعضاء اللجنة يعزفون وأبو ماهر يغني مقطبا ، ويمكن أن

ترقص جولييت في المشهد »

أبو ماهر يا قلبي يا مجروح

عاطف یا حبیب هادا صوت جاروش

المندوب انتظر عليه شوي ، غير أبو ماهر غير

أبو ماهر عيني بتضحك وقلبي بيبكي

المندوب طلاع كمان كمان

أبو ماهر بنادي عليك... ها ها... ها ها

شو قصتك أبو ماهر . صوتك بعشر طبقات ، وبعدك عم المندوب تغنى من القبو ، من المنور ليش ؟ طيب ، طيب . يا ليل يا عين ، يا حليوه يا حليوه . فوق أبو ماهر غصنك يا لمونة ، يا طالعة ع السلم يا نازلة ع السلم ، ما في نتيجة ما ني رايق شبك أبو ماهر المندوب ما بعرف أبو ماهر شو قصتو أبو قصى المندوب مثقل ع لغدا أبو قصى وانت مثقل ع الفطور يا حبيبي على مطربين هالأيام . ولك المندوب أم كلثوم ست وكانت تاكل حلة ملوخية وتغنى للصبح ، وسعاد محمد ما كانت تطلع ع لمسرح الا وهي حامل بالشهر التاسع . وما تنزل حتى تولد ويروح ابنها ع لحضانة بصراحة ما بقدر مثل دور أبو روميو ، وعم جولييت ، وخال أبو ماهر مركشيو وعضو لجنة وراقب الجمهور وغنى . بدك دبكة ع لهوارة الهوارة أنا حاضر . أنا غنى وعواطف وانفعالات . فأنا حتى تعرف انو بناء المسرح العربي على اسس حديثة بدو المندوب تعب وسهر وعرق ودموع أكثر من فريد الاطرش «متوجها الى المخرج» شو رأيك بهالحكي استاذ... استاذ وين عقلك ؟ ليش خليتو براسي عقل . من شكسبير واعصفي يا رياح المخرج واقصفي رومل وزلزلي يا جبال ل... فوق غصنك يا لمونة... وع لهوارة الهوارة .

شو أخبار الجمهور آنسة جولييت المندوب نصو هرب من الصالة أبو قصى لها لدرجة المندوب أي يللي بالشارع هربو بدك ما يهربو من الصالة جولييت في شغلة راح تجنني أبو قصى . صحى الجمهور قرفان المندوب وبردان وجوعان ومو طايق المسرحية ومع ذلك كل شعاراتنا ع لورق صح . والتعديلات والملاحظات صح شوف بعينك أبو قصى أنا برأيي ها لشعارات يللي ما عم نقدر ننفذها نسلمها للقطاع الخاص يا حبيبي شو فهمان ... ونحنا شو بدنا نشتغل المندوب ولا يهمك . حاطط عيني على كام شعار جديد لقطة أبو قصي وضيان ؟ المتدوب بيقعدو عشرين سنة كمان أبو قصي هلاً نخلص من هالورطة بعدين نحكي بهالموضوع المندوب أبو ماهر «يعبر وهو يغنى خودي قلبي واديني قلبك» سمعنا أبو ماهر . المسرحية فشلت ، مشهد البانيو فشل ، المندوب والمدام فشلت ومشهد فريد فشل ويللي استقال ويللي اعتكف ويللى تحجب ما في غير اتصل باللجنة الفنية العليا بالجامعة العربية يخلصونا من هالدويخة وليش ما تتصل بالجامعة راسا هي المسؤولة عنا وعن اللجنة أبو قصى العليا والسفلي فنيا وفكريا معك حق «يرفع سماعة التلفون» الو سنترال ، عطيني الجامعة المندوب

العربية يا ابني ، الامين العام الدكتور عصمت عبد المجيد ،

طبعا ضروري... عندو حفلة ؟ يا ابني انا بدي عصمت عبد المجيد مو عصمت رشيد «ويغلق السماعة» والله ماحدا فهمان على حدا لا عنا ولا عندهن

أبو نوار وشو الحل؟

المندوب شو الحل؟ شو الحل؟ الحل بدي صفيه

أبو ماهر شو بدك تصفى ومين ؟

المندوب المسرح

أبو ماهر جسديا

المندوب ولك لأ... بدي وقفو

أبو ماهر على رجليه

المندوب شو هالمخ ولك أبو ماهر

أبو ماهر لكن شو بدك تعمل فيه ؟

المندوب بدي بيعو

أبو ماهر

أبو نوار

المندوب

جولييت

المندوب

جولييت

أبو ماهر

تبيع المسرح ؟ والممثلين ؟

المندوب بدي بيعهن مع المسرح

ومخرج الجوائز ؟

بدي بيعو أول واحد

والمنتج صاحب الارض والمسرح ؟

بدي بيعو مع المخرج

تبيعو وهوي نايم ؟

وشو راح يعمل بهالحالة أكتر ماعمل المرحوم محمد عبد

المطلب بأغنيتو المشهورة

المندوب وشو بيقول فيها

أبو ماهر بيقول «ثم غنا» ؛

أفيق من النوم واتلفت ، واتلفت ، واتلفت ، واتلفت واتلفت ، واتلفت الما ولما مالاقيكش جنبي ياحبيبي أرجع أنام تاني أبو نوار الله عليك يا أبو ماهر الله عليك المندوب هلا انجلا صوتك بعد ما كسرنا الدف وبطلنا الغني

المندوب هلا انجلا صوتك بعد ما كسرنا الدف وبطلنا العني «المنتج يخرج من الكواليس وهو يفرك عينيه من النعاس»

المنتج شو فيه ، شو صار

جولييت باعوك انت والمسرح والممثلين

المنتج بقديش ... بقديش حضرة المندوب ... بقديش عاطف

عاطف سمعنا استاذ

معقولة المسرح يللي مثل فيه يوسف بيك وهبي اروع مسرحياته

المندوب مين هادا يوسف بيك وهبى ؟

عاطف ولو مشرف عل المسرح وما بتعرف مين يوسف بيك وهبي المندوب ما بعرف نورني

عاطف هادا يللي بعز المعركة مع الاستعمار الانكليزي قال كلمته المشهورة : شرف البنت زي عود الكبريت ما يولعش الا مرة وحدة بعدين المسرح اللي غنى عليه عبد الحليم وفايدة كامل اروع اغاني الثورة والثوار بيكفي يللي غنى فيه فريد

المندوب لانو غنى فيه فريد الاطرش بدي بيعو

عاطف ليش كلكن حاطين حطاط فريد الاطرش ما بعرف؟ نسيتو شو عمل للامة العربية؟

الاطرش اول وآخر همسة تبيعوه ؟

المندوب	قول شو عمل فيها
أبو نوار	ما خلى بعيونا وعيون نسوانا وولادنا دمعة نبكيها عل حدا
عاطف	لأنو كان عم يبكي سلفا عن الجميع عنكن ، وعن نسوانكن ،
	وولادكن وولاد ولادكن كان عم يبكي للمستقبل
أبو ماهر	الله يرحمو ويحسن اليه
	«عاطف يضع شريط كاسيت في فم فريد المفتوح فتنطلق اغنيته
	القديمة الشهيرة
	ياعين بيعي يللي باعوك ياعين انسي يللي نسيوك »
عاطف	«يوقف الشريط» طمن بالك يا استاذ فريد ما راح ينباع ولا
	راح ننسى
جولييت	وكرامة المسرح من كرامتنا
عاطف	«بطفولة عجيبة» صحي وين كرامتي ؟ أنا بدي حق كرامتي
المندوب	كلها
عاطف	يللي بقي منها
المندوب	ما معي فراطة بعطيك وصل فيها تفضل
عاطف	يعوض عليك «يضع الوصل في جيبه بحرص»
جولييت	بس لمعلوماتك يا استاذ المسرح مو شباك تذاكر وستارة
	وتصفيق ودبكة ، المسرح كلمة وفكر وشعر وموسيقي وتراث
	وذكريات واحلام ، المسرح حضارة اذا ما بتعرف لعرفك
المندوب	أنا يللي بعرف ، ولهيك بيسموه جحش الفنون ، ونحنا ما
	راح نحمل جرس ونبيعو بالمزاد بالشوارع
جولييت	لكن ليش تجار البسطرمة جاهزين أول صف؟
المندوب	بيجوز ، مو أكيد يشترو الاراضى الزراعية والمراعى

المحيطة بالمسرح

روميو لهيك سألني واحد منهم : المسرح والكواليس والصالة كام دونم بيطلعو ؟

جولييت لا والله أنا سألني : النهضة المسرحية كلها على بعضها كام فدان بتطلع ؟

المندوب يسأل يللي بدوياه . لانوهادا المسرح ماراح ينباع منو بلاطة ، كل ماهنالك بدنا نهدو لأنو استنفذ أغراضو ، ونبني على انقاضو مسرح جديد بمفاهيم جديدة ومعايير جديدة كلها أمل وبهجة وحبور

أبو بسام ويمكن نحولو لمركز أبحاث ودراسات عن المسرح ماحدا بيعرف

جولييت ومين بدو يهد ومين بدو يبني ؟ حضرتك ؟ حضرتو ؟ المندوب أعوذ بالله ، في لجنة طويلة عريضة وعلى أعلى المستويات العربية بدها تتولى كل ها لأمور .

«يسحب لانحة من جيبه ويستعين بها لتأكيد معلوماته ولطمأنة من حوله»

لجنة مؤلفة من وزراء الداخلية والخارجية والثقافة والتربية والنقل والاوقاف ومندوبين عن الجامعات والفنون والعلوم والفلك والفلسفة والرياصيات والتاريخ والجغرافيا والتراث الاسلامي والعربي والفنيقي والاغريقي ، والمعاهد المتوسطة والمدارس الابتدائية والحضانة ، ومندوب عن الشباب العربي والاحلام العربية برئاسة : وزير النفط

المخرج واللجنة هي عفوية كمان

وحياتك عفوية ، وهي كتاب من الجامعة العربية لتسهيل المندوب مهمتها بس أنا يللي بدو يجنني ، لجنة على هالمستوى الفكري المخرج والاعلامي والفني برناسة وزير النفط؟ ليش؟ له يا استاذ شو ما عم تقرا جرايد ؟ عاطف المخرج ما عم تسمع اذاعات؟ عاطف المخرج ما عم تشوف تلفزيونات ومسلسلات ومحطات فضائية عاطف وأرضية ؟ المخرج اذا ما عم تقرا جرايد ولا عم تسمع اذاعات ولا عم تشوف عاطف تلفزيون... ما عم تشمّ انت بتخرس ، وبتروح ع لجاروف والمكنسة تبعك المخرج كنستو مية مرة اليوم عاطف عمهلك شوي عليه ، هادا عاطف حبيب الملايين ، وأعظم جولييت ممثل احتياط بس ما اجا دورو بعد بدو يكنس حتى يعرف هو وغيرو كلمة مين بدها تمشي المخرج بها المسرح خزيت العين جولييت «يصفق مبتهجا بما ألت اليه الامور» يالله شباب شرفو ع المندوب العشا أكبد جعتو

أبو بسام

جعنا وبس

المخرج قليل شو تعبنا اليوم ؟

أبو بسام وين عازمنا ؟

المندوب ع الهيلتون ، الشيراتون الكارلتون اختاروا المطعم يللي

بتريدو بس يكون أمريكي

جولييت ليش أمريكي

المندوب لانهم كرما بالاكل والشرب بشكل غير معقول ، بتعرفي

كأنو هالاميركان أصلهن عربي

جولييت أو هالعرب أصلهن أميركان

«ينصرف الجميع ولايبقى غير عاطف ومكنسته مكبا على عمله»

أبو مضر لا تأخد على خاطرك كتير . كله شغل وانتاج لهاالامة

هلاً بتسمي الزبالة انتاج ؟

أبو مضر طبعا . بتعرف ببلاد بره شو عم يعملو منها ؟

عاطف لا والله ، نورني .

عاطف

أبو مضر عم يعملو من الزبالة ، ورق ، زجاج ، زهور صناعية ، بلاستيك ، وأدوات زراعية وكل شي بيريح وبيخدم الانسان

عندهن

عاطف وعنا بيعملو من الانسان زبالة!!

المندوب شبك أبو مضر في شي

أبو مضر هادا المستخدم عاطف قلبي مو مطمنلو

المندوب يبلط البحر

أبو مضر ببيروت عم يبلطوه

المندوب موضوع عاطف أنا بدبرو ، لا تشغل بالك

«يخلو المسرح ويظلم»

«ينهي حوارا عقيما مع السنترال على الهاتف» ؛ طيب وزير	عاطف
الثقافة ؟ وزير الاعلام ؟ وزير التموين ؟ وزير بلا وزارة ؟	
كمان نايم ؟ عظيم . بس حدا منهن يفيق الليلة ، أو بكره	
أو بهالسنة أو بهالقرن خليه يتصل بمسرح النخبة ، القضية	
حياة أو موت «يغلق السماعة ويدور بعصبية حول الهاتف وهو	
يتصفح بقلق كتابا عن المسرح عندما تدخل جولييت مبتهجة	
ومندهشة من حفلة العشاء »	
شوعشا يا عاطف؟ شوعشا؟ يا ريتك رحت معنا .	جولييت
خاروف مكتف على صدر رز من هون لهنيك .	
والله أنا مو جاي على بالي غير شي مسؤول مكتف عصدر	عاطف
رز ، عصدر أمه ، وما خلي منو غير العضام والاوسمة	
أف . خير ؟	جولييت
عمري ما حاولت اتصل بمسؤول أو قابل مسؤول الا وقالولي	عاطف
نايم . ايمتى عم يسهرو عمصالح الشعب ما بعرف	
يمكن بيسهرو باوربا وبينامو هون	جولييت
«يسحب زجاجة من جيبه الداخلي ويشرب على دفعات»	عاطف
عم تشرب عالريق ؟	جولييت
ما فينا ناكل عل قليلة منشرب	عاطف
ولا يهمك «تندفع نحو الهاتف وترفع السماعة» في مطعم	جولييت
جديد فاتح قريب من هون اسمو مطعم الارهاب والكباب ،	
لح اطلبلك وجبة تاكل صوابعك وراها	
بس هادا اسم فلم مشهور ومسروق لعادل امام	عاطف

جولييت

أي لهيك فتحو على اسمو مطعم «تدير قرص الهاتف»

عاطف بس رجاءا لا تطولي المخابرة بخاف حدا يتصل مشان المسرح

جولييت بامرك استاذ عاطف . ألو مطعم الارهاب والكباب أنا الفنانة جولييت من مسرح النخبة ، الله ينعم عليك . وحياتك بدي تبعتلي كيلو كباب مع كام صحن على ذوقك . نعم ؟... شكرا «تغلق السماعة»

عاطف شو؟

جولييت قال الكباب خالص ، مو باقى عندهن غير الارهاب

عاطف ناقصنا

جولييت حظك بيفلق الصخر

عاطف «يشرب من الزجاجة» اصلا مين الو نفس ياكل بعد هالبهدلة يللي اكلتها من مخرج الجوائز

جولييت لا تشكيلي ببكيلك

عاطف صاير معك شي اليوم ؟

جوليييت اليوم وكل يوم... لكن معقول يا عاطف بعد عشرين مسرحية ملتزمة رايحة جاية بالباص عالمسرح وعالبيت . وبتعرف زحمة الباصات ؟

عاطف أنا يللي بعرف

جولييت

الناس فوق بعضها ، موظفين وموظفات ، وحوامل ومرضعات ، وكادحين وكادحات . وكادحة سابقة يمكن ما بتعرف تكتب اسمها ، طالعة من عند الكوافيير ، وناطرتها سيارة مرافقة الها ، وسيارة مرافقة لشعرها . يقطع الالتزام وساعتو

هدول ناس عابرين	عاطف
هلاً حضرتك خالد ؟	جولييت
وشو لزوم هالحكي ؟	عاطف
يعني كتير على الله يكون عندي سيارة ؟	جولييت
انت بيطلعلك طيارة	عاطف
وانت كفنان شامل واربعين سنة بالمسمرح ليش لحتى ما	جولييت
يطلعلك سيارة ؟ وشبح كمان	
لا لا دخيلك . أنا المخابرات العربية تتركلي رجلي صاغ	عاطف
سليم عم روح واجي فيهن وأنا ممنون شواربهم من المحيط	
للخليج «يتابع القراءة» : أما بناء المسرح العربي الحديث	
فيتطلب ثلاثة شروط لا غني عنها ولا مناص منها	
لك ايا مسرح وايا بناء المسرح بدهن يهدو	جولييت
مين قالك ؟	عاطف
هيك فهمنا من اللجنة عالعشا . لكن ليش قبلت عزيمتهن ؟	جو لييت
لسواد عيونهن ؟	
يهدوه منعمر مسرح تاني	عاطف
يا عاطف يا حبيبي المشكلة اذا هديت مسرح أو مستشفي	جولييت
أو مدرسة أو بناية ، بتقدر تعمر بدالهن وأحسن منهن بسنة	
بسنتين ، انما لما بتهد الممثل والطبيب والمعلم	
والمهندس ، كيف بدك تعمر بدالهن ، وايمتى ؟	
بيضل فيه ناس وفنانين ما بينهدو بسهولة ، الجبال بتنهد	عاطف
وهني ما بينهدو	
وينهن	جولييت

لكن ليش أنا ناطر جنب التلفون ، لحتى يتصل حدا منهم عاطف ونعرف شو بدنا نعمل ، مخرج ، مؤلف ، ممثل درامي ، ممثل تنفيسي المهم حدا يتصل عم تروح وقتك ووقتى ع لفاضى جولييت انت حرة ، أما أنا بدي ضل منتظر حتى يرن هالتلفون ولو عاطف راح يصير فيك متل موشى دايان بعد حرب حزيران ، متل جولييت ما حكالنا جدى ليش شو صار معو هاتي لشوف عاطف هادا يا سيدي بعد ما انتصر بالحرب ، راح فورا على مكتبو جولييت وقعد جنب هالتلفون ليل ونهار ، وهوي متوقع بكل لحظة يرن هالتلفون ويتصل فيه حدا من الزعماء العرب ويطلب الصلح ، وضل ينتظر وينتظر ، والعرب يضحكو ويضحكو ، وهوي ينتظر وينتظر ، والعرب يضحكو ويضحكو لحتى طقت خواصرهن ، ومات المسكين وهي بحرقة هالتلفون أي لو ضل عايش لهالاً ، لو صار سنترال ما راح يلحق ع عاطف لمكالمات انت جاوبت حالك جولييت عاطف

ومع ذلك بدي انتظر وانتظر ، مو ممكن مستحيل ، أهم مسرح عربي ينباع مع الممثلين والمخرج والمنتج ، وماحدا يتحرك أو يسأل ليش ؟ وشو صار ؟ مو ممكن حبيبتي مو ممكن

«يدخل ساعي البريد يجرجر قدميه من التعب ومعه رزمة

برقيات »

ساعي البريد هون مسرح النخبة

جولييت سابقا

عاطف ولاحقا ، هات لشوف شو معك

ساعى البريد برقيات

عاطف كيس برقيات؟ لمين؟

ساعي البريد الى الجنة الانقاذ العليا لتطوير وتحرير المسرح العربي

جولييت هات لشوف «تخطف احدى البرقيات وتقرأ »

نبارك ونؤيد بكل حزم خطوتكم الرائدة والشجاعة في بيع المسرح العربي مع كامل ممثليه ومخرجيه ومؤلفيه ، بغية تحريره من العبث والتحجر ، وانقاذه من العروض الهابطة والمسيئة لاخلاقنا وتراثنا ، ونرجو أن تكون خطوتكم التالية هي بيع المشاهدين أيضا لتكون ردا صارخا على الافتراءات والادعاءات المغرضة التي تقول وتروج بأن الفنان بشكل خاص ، والانسان العربي بشكل عام ، رخيص وبلا ثمن ، سيروا الى الامام ونحن من ورائكم... ومسرح حتى النصو

«ثم تلقي بها على أرض المسرح بحزن ولامبالاة»

عاطف مین مین ، هاتی لشوف

جولييت شو بدك تشوف عشرات التواقيع فنانين وممثلين ومخرجين ومطربين عمري ماسمعت فيهم

معقول هالحكي ؟ شوفي غيرها

جولييت كلها نفس الشي...

عاطف

وكلهن فنانين عاطف «وهي تتصفح البرقيات وتبعثرها » فنانين وأطباء ومهندسين جولييت ومحامين ومتهمين ، وحلاقين ومقاولين ومتعهدين أنا بعرف كلها من البلاد العربية عاطف ومن بلاد ما سمعنا فيها جولييت يعنى ما عاد فيه شي ننتظرو عاطف ولا ينتظرنا جولييت ولا نسمعو عاطف ولا يسمعنا جولييت ولا نحكى معو عاطف ولا يحكى معنا جولييت عاطف ولا نوثق فيه ولا يوثق فينا جولييت لا ندافع عنو عاطف ولا يدافع عنا جولييت «وهي تدور في أرجاء المسسرح وتتنمس جدرانه وديكوراته جولييت بشغف وألم عميقين » كان عنا هالمسرح... امنا وأبونا وحاضرنا ومستقبلنا وساتر عيوبنا وكاشف عيوب غيرنا ، وبكرة اللجنة جايي قدامها الخطابات ووراها الجرافات ليهدوه على راسنا وراس يللي

عاطف طولي بالك شوي لنعرف شو بدو يصير جولييت لايمتي يا عاطف لايمتي ؟ وقطار العمر عم يجري وخايفة

خلفونا

	تصير حالتي متل حالة الزميلة مارليين مونرو
عاطف	ما في شك المسرح راح يترك فراغ كبير بحياتك ولازم
	تعبيه
جو لييت	«بعصبية» منين بعبيه؟ من الفيجة؟ من الكازية؟
عاطف	اذا ما في غير حل واحد
جولييت	لحقني فيه ايدي بزنارك وحاج تشرب
عاطف	الحل انا نتزوج
جولييت	«مصعوقة» أنَّا وأنت؟ طيب ع فرض غالي والطلب رخيص
	وين بدنا نتزوج؟ بالشارع؟
عاطف	لا هون ومنحط اللجنة أمام الامر الواقع
جولييت	عالمسرح قدام اللجنة والجمهور ؟
عاطف	لا ورا الكواليس
جولييت	ليش كتعة عرجة حتى اتجوز ورا الكواليس ؟ وربي ولادي
	ورا الكواليس لا حدا يشوفن ولا يشوفو حدا ؟
عاطف	ارجوك لا تفهميني غلط هو صحي رح نتجوز ورا
	الكواليس . لكن بس تحبلي بالسلامة وتصيري بالشهر
	التامن أو التاسع ببعتك فورا لتولدي باميركا
جولييت	«باستغراب» ولیش بامیرکا ؟
عاطف	حتى الاولاد ياخدو الجنسية الاميريكية يا غشيمة
جولييت	معقولة فنان ملتزم متلك ومؤمن بعروبتو وبلادو يفكر مجرد
	تفكير بهالطريقة ؟
عاطف	وشو فيها ؟ أهم المنظوبن بالفن والعروبة واليمين واليسار
	بيحبلو نسوانهن بالوطن وبيولدوهن باميركا

جولييت

عاطف

جولييت

عاطف

هيك بكل بساطة بتتخلى عن ولادك وضناك ؟ يا عيب الشوم يا عاطف يا عيب الشوم

ومين قالك رح اتخلى عنهن أو يتخلو عني أو عن أيا عربي . كل ما هنالك أنو كل واحد مهما كان أصلو وفصلو بيكتسب الجنسية الاميركية ، بدو يخدم بالجيش الاميركي تلقانيا يعنى هدا شي بيشرف ؟

«وهو يكرع كرعة كبيرة من زجاجته» اسمعيني شوي وباعتبار الجيش الاميركي رايح جايه ع بلادنا وقدام العرب حصارات كتيرة بالمستقبل فمن المحتمل يصير نص المارينز يللي بدهن ينزلو ع شواطننا ويحاصرونا من أصل عربي . ولذلك من المستحيل يعاملونا كاجانب لانا من أصل واحد وبيجري بعروقنا دم واحد وهيك بيصيرو يهربولنا أكل وشرب وادوية وبطانيات ومعلبات بدون ما تنتبه اميركا أو مجلس الامن أو المراقبين الدوليين . وحتى لو انتبهو شو بيقدرو يعملو ؟ ولا شي . ولاد عم يساعدو اهاليهم . وهيك بيصير الحصار قضية عائلية . ولذلك الحبل بالوطن والولادة باميركا قضية وطنية مية بالمية ، وخطة استراتيجية ما حدا انتبهلها لحد

غير حضرتك

هلأ

«وهو يشرب ويسير بخيلاء » طبعا

ولك شو عم تخربط وتحلم . حتى ورا الكواليس ما راح يصحلنا نتجوز ، لأنو بدهن يهدو المسرح فوقاني تحتاني كام مرة بدنا نعيدها ؟ وبعدين شو هالانجاز الفني أو الوطني جولييت

عاطف

جولييت

انو نتج وز ونجيب ولاد ؟ القطط والكلاب بالشارع عم تتجوز وتجيب ولاد

لكن شو بدنا نعمل؟

لازم نعمل شي نتحدى فيه اللجنة والعالم كلو والتحدي مقاومة . وأنت ما بتحب المقاومة وأطفال الحجارة يا عاطف ؟

طبعا دخيل عيونهن بس شو صار فيهن «يكرع من زجاجته» هلا أنت مع المسرح ولا مع القضية ؟

أنا معك لأنو انت المسرح والقضية والعالم كلو

اذن سكوت واسمعني

تفضلي

انت بتعرف ليش بدهن يهدو المسرح ؟ حتى يعمرو واحد جديد متلو وأحلى

اذا بدهن يعمروه من جديد ليش خربو بالاساس

هادا بينطبق أكتر شي ع لبنان

تركنا من لبنان وغير لبنان ، وخلينا بالمسرحية ، ليش تركو كل شي فيه مسرحيات هابطة وتهريج وتفاهة وكباريهات وتزليط بالوطن العربي كلو ، وركزو على هالمسرحية ، وقلبو عاليها سافلها ، ورقصو ودبكو برجليهم على قصائدها وحوارها وعواطفها ، وعلى كل كلمة فيها ، وما عاد عرفنا فصل من فصل ومشهد من مشهد

منشان الامل والفرح والبهجة والحبور

لا تجدبها عاطف

عاطف

جولييت

عاطف جو لييت

عاطف

جولييت

عاطف

جولييت عاطف

جولييت

عاطف

جولييت

عاطف جو لييت

اللجنة قالت هيك ، مو من عندي	عاطف
شو بدك بيللي بيقولوه وفكر بيللي بيعملوه	جولييت
طيب ليش عملو فيها هيك برأيك ؟	عاطف
منشان نهايتها ، لانهم ما بيتصورو ، ولا بدهن يتصورو ،	جولييت
انو بعد فيه تنين بهالعالم ، بهالامة ، ممكن يحبو بعضهن ،	
ومستعدين يموتو في سبيل هالحب ولو تمثيل ع لمسرح	
بس لازم الانسان يحب شي بهالعالم	عاطف
أبدا لازم تحبهن الهن وبس	جولييت
لهالدرجة عقلهن صغير	عاطف
وأكتر من هيك في منهم بيتضايقو من نجم رياضي ، من	جولييت
مذيع صارلتو شعبية بين المشاهدين ، ولك من راقصة ، من	
أكلة جديدة حبوها الناس وصارو يطبخوها ويحكو فيها	
بالسهرات والاستقبالات يومين على بعضهن	
يتضايقو ، يغارو ينضربو على قلبهن ، ليش حاملة همهن	عاطف
لهالدرجة	
ولك خربو المسرحية والمسرح قدام عيوننا ونحنا واقفين	جولييت
عم نتفرج	
وحوش . شو منقدر نعمل معهن أنا أو أنت	عاطف
منقدر نعمل يللي ماكان بدهن ياه ينعمل	جولييت
شو هوي	عاطف
نكمل المسرحية متل ما كانت مكتوبة ، ومتل ما كنا بدنا	جولييت
نقدمها بالحرف لأخر مشهد ولأخر كلمة ، ومتل ما كنا	
بدنا نقدمها بالحرف	

عاطف وننتحر متل ماانتحر روميو وجولييت بنهاية المسرحية وتصور منظر اللجنة والجامعة العربية ، ويللي ورا اللجنة والجامعة العربية ، وهني عم يشوفو ، بعد كل شي عملوه... روميو وجولييت من هالامة متعانقين متل طيور الحب... ومنتحرين الى الابد .

شو قصدك... الى الابد؟

يعني ننتحر عن جد ، مو عن مزح ، متل ما أراد شكسبير تماما ، ومتل ما انتحر منات من الشعرا ، والعلما ، والعشاق والفرسان في سبيل فكرة آمنو فيها ، أو كلمة شرف قالوها ، أو وعد قطعوه على انفسهم ، أو وضع قرفو منو

متل مين ؟ متل مين ؟ الشغلة ماعاد فيها مزح

تركنا من التاريخ القديم وخلينا بالمعاصر... همنغواي ، خليل حاوي ، بعدين في شباب أصغر مني ومنك سكبو الكاز على تيابهم وحرقو حالهم بشوارع براغ وساحة نانامين بالصين ، منشان كرامتهم وحرية بلادهم ، ونحنا بدنا نموت في سبيل أقدس مافي بالحياة... في سبيل الحب والغرام... شو قلت

انت فصلي وانا بلبس

يعني موافق ، تلعب الدور قدامي ، وأصلا طول عمرك بتحلم بهالدور

معقولة ارفضلك طلب ، لانك مابتعرفي شو انت بالنسبة الي . انت رمز ، حلم ، اسطورة

عاطف

جولييت

عاطف

جولييت

عاطف

جولييت

عاطف

آه ما أروعك وما أنبلك يا عاطف ، من لما رفضت دعوة	جولييت
اللجنة ع لعشا ورفضت تبيع حالك قلت هادا فنان عندو	
كرامة	
طبعا ومعي وصل فيها	عاطف
«يفتش جيوبه ويفرغ ما بداخلها عبثا عن الوصل اياه »	
هادا وصل رتي بنطلون من المصبغة ، وهادا وصل من	عاطف
الكندرجي ضبان وتصليح كعبية ، وهادا اسم مرهم ، وهادا	
اسم منجم وهي ورقة يانصيب	
ليش بتؤمن بالحظ ولك عاطف	جولييت
لما ما بيكون فيه عدالة بيلجأ الانسان للحظ ، للسرقة ،	عاطف
للقتل ، وأحيانا للخيانة	
انت مو فنان بس ، انت فیلسوف کمان	جو ليي <i>ت</i>
طبعا ، ولازم أمن على راسي	عاطف
ما عاد فيه وقت تأمن أو تؤمن بغير الحب	جولييت
بتعرفي ، طول حياتي الفنية وأنا فكر بالانتحار ، بس كان	عاطف
ناقصني السبب وهلا الحمد لله مشي الحال على ايدك بس	
بتضل حرقة بقلبي	
قول حبيبي قول فضفض ، نحنا على أبواب الآخرة	جولييت
كان حلمي بهيك حالة اترك ورايي زوجة حلوة حتى وين ما	عاطف
راحت وين ما اجت يقولو هي أرملة الفنان فلان الفلاني	
أي ضحاك بعبك يللي ما وراك حدا قال أرملة قال ، حتى	جولييت
يلزقو فيها بالباصات وما حدا يمشيلها معاملة الابعد ما	
يغازلها	

عاطف حتى لو عرفو انها أرملة فنان شامل وبناتهن جولييت ولك عم يتطاولو حتى على أرامل الشهداء وبناتهن

عاطف يا لطيف

جولييت قال ارملة حلوة ليك الاجدب

عاطف لك عجلي خلينا ننتهي بسرعة ، بشو بدنا ننتحر بالمسدسات

« تظلم الصالة رويدا رويدا »

جولييت لا شو بالمسدسات بالسم متل مو مكتوب بالمسرحية وجبت قنينتين وحدة الي ووحدة الك ، يالله حبيبي روح شلاح وغير تيابك ، ولبوس لباس روميو وتعطر وسرح شعرك ورتب حالك ، وطلاع حملني ونزلني ع لسلم درجة درجة يالله بسرعة روح غير تيابك ، بعدك واقف

عاطف صرت شالح ولابس هالليلة أكتر من كازانوفا ، وكلوع لفاضي

جولييت لأ الليلة عرسنا... عرس المسرح العربي

«تظلم الصالة تماما... لفترة مع موسيقى دقوا المزاهر ، ثم تضاء على جولييت على رأس السلم بثياب العروس البيضاء مع قفازات بيضاء ، وعاطف متأنق بقدر المستطاع مع بابيون أبيض وقفازات بيضاء يحملها بين ذراعيه ويهبط بها السلم درجة درجة مع موسيقى دقو المزاهر ثم يتوجه بها الى حيث التابوتين المتلاصقين في صدر المسرح والمائلين بحيث يمكن مشاهدة مافى داخلهما ، ينزلها على الارض»

جولييت تفضل حبيبي تسطح

هادا صندوق مو تابوت	عاطف
يالله حبيبي هوي تمشاية حال	جولييت
بعدين قصير ما بيساعني	عاطف
ليش قديش طولك خزيت العين	جولييت
مو ثابت بطول وبقصر حسب الظروف	عاطف
ما فهمت	جولييت
يعني طولي بالاحوال الطبيعية ١٧٠ ، وقدام الحواجز أو	عاطف
الشرطة أو المخابرات ٧٠ وأحيانا ٦٠ حسب الموقف	
هلاً ما طولت غير على حظي	جولييت
«عاطف يتمدد في التابوت ، تضع له وسادة تحت رأسه»	
شكرا حبيبتي	عاطف
«تخرج من حقيبتها زجاجتي السم كما هو مفترض» أي قنينة	جولييت
بتريد حبيبي	
الخضرا الخضرا حبيبتي	عاطف
يا الله ما أروعك حتى بلحظات الموت متفائل	جولييت
طبعا ، لأني طول عمري أحلم المسك لمس ع لمسرح ،	عاطف
اسمع صوتك من وراء الكواليس وهلا الله أكرمني وبدو	
ياخد روحي وأنا جنبك	
«وهي تتمدد داخل تابوتها » وأخيرا حققنا حلمنا	جولييت
مرتاحة هيك حبيبتي	عاطف
طالما أنا جنبك مرتاحة	جولييت
«يرفع رأسه ويميل اليها » حبيبتي ليش مامنموت متعانقين	عاطف
متل طيور الحب وعيوني بعيونك متل ما قلت ؟	

جولييت	حبيبي ما بقدر اتحمل نظراتك ، أنا ست وبعرف ، ما في
	وحدة ممكن تتحملها أو تقاومها ، يالله شراب حبيبي وين
	قنينتك ؟
عاطف	ليكها ، بس مو المفروض تنتحري انت بالاول بعدين لما
	بكتشف
جولييت	شو بدك تكتشف لتكتشف ، عشنا سوى وبدنا نموت سوى
عاطف	ونصرخ متل عبد الوهاب وليلي مراد : يحيا الحب ، يحيا
	الحب ، كاسك حبيب
جولييت	كاسك عيون
	«يقرع كل منهما زجاجته بزجاجة الآخر ويكرع رشفة منها »
جولييت	شراب ، شراب ما شبعنا من الحياة خلينا نشبع من الموت
عاطف	«يتوقف عن الشرب ويرفع رأسه مرة أخرى من التابوت ويميل
	اليها » حبيبتي
جولييت	شبك حبيبي
عاطف	ما كان لازم نترك كلمة ولو صغيرة للناس ، للمشاهدين ،
	ليعرفوا الحقيقة ، وشو عملت فينا اللجنة ، وقديش ظلمتنا
	وعذبتنا ؟
جو لييت	بكرة بتقابل وجه ربك ، وبتقللو كل شي ، وهوي بعدين
	بيعرف شفلو معهن
عاطف	أي نحنا موظف صغير ماعم نقدر نقابلو بشهر
جولييت	الشهدا الهن الافضلية
عاطف	افضلية المرور ؟
جولييت	بكل شي ، خلصني شراب شراب قبل ما تنجى اللجنة ، شبك

عم تمزمز

ما عم يؤثر فيي كتير عاطف

السم بدو وقت لياخد مفعولو جولييت

« عاطف يرفع رأسه مرة أخرى »

شبك عاطف راح تنزع المشهد

طول عمري كنت احلم مثل دور زعيم عربي عاطف

> أي هني بالكاد عم يمثلو أدوارهن جولييت

او دور يوسف وهبي وهوي عم يصرخ بحبيبتو : أنا يللي عاطف

شلتك من الوحل يامجرمة

تسطح وشراب وبلا كتر حكى ، وبلا طمع ... عم تمثل دور جولييت

بيحسدك عليه لورانس اوليفييه ، ماصارت بأي مسرح بالعالم ، روميو وجولييت عم ينتحرو فعلاع لمسرح ... يا

سلام

خبر انشاء الله عاطف

شو مانك واثق من كلامي

جولييت لولا ما أوثق فيك وبكلامك وكلام غيرك كنت وصلت لهون عاطف

« يدق على خشب التابوت »

«يدخل ساعى البريد ومعه رزمة برقيات»

شو عم تعملو عندكن ساعى البريد

> عم ننتحر جولييت

> > تفضل عاطف

شكرا سبقتكم ساعى البريد

شو برقيات تأييد للجنة كمان ؟ عاطف

ساعي البريد	لأ برقيات تعزية «يخرج»
جولييت	يا لطيف هالمشهد شو ميسر ، انتحرنا من هون بلشت
	برقيات التعزية تجي من هون
عاطف	المسرحية كلها ميسرة
جولييت	بكرة شوف بس ينذاع الخبر بالوسط الفني ، لتقوم الدنيا
	وتقعد ع للجنة وأبو اللجنة وخود على خطابات ومظاهرات
	وحفلات تأبين
عاطف	«وهو يرفع رأسه مجددا بل وانه يحاول الخروج من التابوت
	« ليناه
	بطلت انتحر حبيبتي ارجوك
جوليي <i>ت</i>	من شو خایف ومرعوب ؟
عاطف	من خطابات التأبين ومعلقات الرثاء يللي ما بتخلص ، ما
	بدي موت مرتين أرجوك
جولييت	أي تسطح وبلا قلة عقل ، وقتها بتكون بعيد بعيد بغير
	دنيا ، وبالجنة لابتشوف ولابتسمع شي من هالدنيا الفانية
عاطف	لا والله فيه ميكروفونات بتوصل ما بدي
جولييت	حبيبي هادا مو انتحار ، كل كلمة والتانية بدك ترفع راسك
	وتعملي خطاب ؟
عاطف	يعني ما بيطلعلي ارفع راسي شي مرة بهالعمر قبل ماموت ؟
جولييت	«شبه باكية» أرجوك لاتحكي هيك بتعرفني قديش عاطفية
عاطف	«يمسح دموعها» بس حبيبتي ، انشا لله بتقبريني «يكرع
	من زجاجته »
جوليت	ه آنا ؟

يا ستى بس نموت مين ما يقبرنا يقبرنا عاطف مو باین جولييت ليش عاطف خلصت القنينة وبعدنا عايشين جولييت السم بدو وقت لياخد بالجسم عاطف فعلا بلش جسمى ينمل جولييت وأنا ارتخت مفاصلي عاطف قربت النهاية جولييت أى والله قربت قربت «يدق رجاجته بزجاجتها فرحا » عاطف الى اللقاء بالجنة... على نهر الكوثر الى اللقاء على نهر الليطاني جولييت «يستيقظ سعيدا ومستغربا كونه مازال على قيد الحياة ، ويزداد عاطف استغرابه عندما لا يجد جولييت مسجاة الى جواره» وين راحت ؟ يمكن سبقتني ع لجنة ، دائما مستعجلة ، حبتني بسرعة واقنعتني بسرعة ، تسلملي شو بتحب المسرح والوطن والانسان ، ضحت بحياتها منشانهن «يسمع ضحكة نسائية عالية» معناتها حبنا أقوى من الموت ، هي ضحكتها بعرفها من بين ألف بلبل وكنار ، وين عم تغرد ما بعرف ، لشوف شو القصة ،

«وينظر خلسة الى الشرفة حيث مصدر الصوت فيفاجأ بجولييت ترمم أصباغ شفتيها وتتحدث الى اللجنة عنه وعن واقعة الانتحار ، فيصحو تماما من أوهامه ويقترب لاستراق السمع» :

جولييت نشف ريقي ودموعي

المندوب	يعني عملتيلو غسل دماغ
جولييت	ليش عندو دماغ لينغسل ، لا بيسكت ولا بيخلي حـدا
	يسكت
المندوب	شك أو ارتاب بشي ؟
جولييت	بلع الطعم للآخر
المندوب	لكن شو صار ؟
جولييت	شي ما بيتصدق ، السم طلع مغشوش
المندوب	مغشوش ، شو هالزمن هادا ما عاد حدا عندو ضمير
جولييت	حتى السم غشيتوه ، ياويلكم من الله
أبو ماهر	نحنا ما دخلنا ، نحنا مسؤولين عن السموم الفكرية مو
	الطبية
المندوب	كنت جربي شي تاني
جولييت	جربت حتى دوا الصراصير يللي بيقضي ع لحشرات الزاحفة
	والطائرة والناطة وما مشي الحال ، طلع مدة صلاحيتو
	خالصة ، حظو بيفلق الصخر
المندوب	خيرها بغيرها ، وعلى كل حال هي فركة ادن الو ولكل أهبل
	متلو بيحاول يطير بره السرب
جولييت	عاطف أرجوك سمعني
عاطف	ما حدا يحكي معي رجاء
جولييت	معك حق بس لازم تقدر ظروفي أمي مريضة وأبي مشلول
	وأختي عمياء وجدي معه القلب ولازم نعمله عملية
عاطف	لا تعمليلي فيلم مصري خلص كل شي انكشف على حقيقته
جو لييت	خليني اشرحلك

عاطف

جولييت

عاطف

ما بدي حدا يشرحلي . أو يبررلي أو يفهمني حلو عني في ستين داهية . «تخرج»

«أعضاء اللجنة يغادرون مع جولييت ويبقى عاطف وحيدا على المسرح يدور ويتخبط وسط الظلال والهواجس » :

معقولة جولييت وهم ؟ وروميو وهم ؟ وشكسبير وهم ؟ والحب والصداقة والزمالة ورفقة المسرح والسفر والمدرسة والطفولة والمعتقلات وهم ؟

وثورة الفكر والفن والعلوم ، والفلسفة والفلك والرياضيات ، والثورة الروسية والثورة الفرنسية وثورة سبارتاكوس وهم ؟ وموسيقي بيتهوفن ، واوبرا فاغنر وقصاند لوركا وأراغون وعيون الزا وهم ؟

والتراث والمعاصرة والمتنبى والمنفلوطي ، ويوسف وهبي ويوسف الخال ومجلة شعر ، والناقد والآداب والاديب ، والمعارك الادبية وهدير المطابع وهم ؟

والتاريخ والجغرافيا وجبال الصوان ، وبعلبك أنا شمعة على دراجك ، وياحرية ياطفلة وحشية ، وشوارع القدس العتيقة والحديثة وفيروز والرحابنة واطفال الحجارة وكهول الحجارة وأزهار غوغان ، وسنابل فان كوخ وملائكة روفائيل ، والربيع والخريف وكل الفصول والحضارات والفنون والاطفال والعصافير و الفراشات بهالعالم وهم ؟

وماعاد فيه حقيقة بهالعالم غير اسرائيل والبترول ؟ أكيد هي مؤامرة ليجننوني مسرحيا وعاطفيا واقتصاديا ، بس أنا ماراح جن ، بجنن بلد ، لانبي أنا مو وهم... أنا

حقيقة وهي ايدي ، وهي رجلي ، وهادا كتفي ، وهادا انفي ، وهادا راسي ومؤمن عليه كمان .

وهادا مسسرح ، وهادا هاتف ، وهادا شباك تذاكر ، وهي مكنسة وهاد صرصور وهادا وطن


يحده من الشرق البحر الابيض المتوسط وجزيرة قبرص وجزير مالطا ، ومن الغرب المحيط الهندي ومضيق هرمز والطنب الكبرى والطنب الصغرى

ومن الجنوب تركيا والبحر الاسود وبحر قزوين ومضيق البوسفور ومضيق الدردنيل

ومن الشمال كينيا ونيجريا ومنابع نهر النيل ومضيق جبل طارق وبقية افريقيا

وفوق بالسما... القصر العربي عربسات عم يراقب الرايح والجاي ، وتحت الارض سجون ومعتقلات وزنزانات فردية وجماعية ، وغير ذلك من البنى التحتية المعروفة من المحيط الى الخليج ، وكلها من الباطون والاسمنت المسلح ، وبواب وشبابيك حديد ما بتمر منها البرغشة ، ف... وين بدها تطير اسرائيل ؟ وين ؟

«وينتصب على قدمية شامخا باسما مرفوع الرأس كجندي نازي في ذروة انتصاراته»





... وثورة الفكر والفن والعلوم ، والفلسفة والفلك والرياضيات ، والثورة الروسية والثورة الفرنسية وثورة سبارتاكوس وهم ؟

وموسيقى بيتهوفن ، واوبرا فاغنر وقصائد لوركا وأراغون وعيون الزا وهم ؟

والتراث والمعاصرة والمتنبي والمنفلوطي ، ويوسف وهبي ويوسف الخال ومجلة شعر ، والناقد والأداب والاديب ، والمعارك الادبية وهدير المطابع وهم ؟

والتاريخ والجغرافيا وجبال الصوان ، وبعلبك أنا شمعة على دراجك ، وياحرية ياطفلة وحشية ، وشوارع القدس العتيقة والحديثة وفيروز والرحابنة واطفال الحجارة وكهول الحجارة وأزهار غوغان ، وسنابل فان كوخ ومالائكة روفائيل ، والربيع والخريف وكل الفصول والحضارات والفنون والاطفال والعصافير و الفراشات بهالعالم وهم ؟

وماعاد فيه حقيقة بهالعالم غير اسرائيل والبترول؟